

T9155/1141.2(5)

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
APR 15 1952

05



Made in Japan

居易錄卷十八

濟南 王士禛



洪洞范鄙鼎彪西寄所著理學備考廣備考乞序范
順治辛丑進士養親不仕隱居師曠故里講洛閩之
學河汾間人士多從授經康熙戊午山西巡撫應
詔以博學宏詞薦不出奉 溫旨人益仰重之
所著書凡數十種云

輝縣冀氏世傳楊忠愍公詔獄中畫梅一卷自題長
歌其上河南提學副使族兄書年際常見而和之

李閣學枬倚江言其世祖文定公春狀元及第明世

廟甚眷之超拜翰林學士同侍講嚴訥中允董份俱直西內撰立賜一品服時六部尚書無一品服者一日候朝午門外文定衣賜衣趨而入六卿於棕棚下望之色動鄭端簡公曉口占絕句云翰林學士信堪誇新賜宮袍一品紗可惜六卿身上鶴一朝飛向別人家諸公皆大笑絕倒

又言始祖李翁老農也居句容山中地名大村爲縣人曹尚書義家佃種會尚書釋葬地青烏家爭集其門江西一地師來獻圖云某壤最吉卽大村地也尚書不甚信薄贈而遣之地師怏怏復往大村徘徊瞻

眺自恨其言之不售已而風雪大作日已暮無託宿處翁適往田因延至其家饋以雞黍地師深德之次日晨起見屋後有草舍半照雪壓將圯雙棺暴露問之翁曰吾父母也貧不能買兆域久而未葬地師曰窮途荷君高誼無以爲報此間曹尚書家有吉壤若葬之富貴可數百年科第不絕翁曰吾方爲尚書家佃田安能有之地師曰但往哀乞無害也然葬畢當速去慮其追悔耳翁如其言往值尚書方據案作書泣拜以告尚書領之翁則出白布一幅求尚書押字又允之急歸以告地師喜曰君福人也爲指其穴葬

畢辭去翁往謝尚書卽星夜攜妻孥荷擔渡江而北
至興化居焉自是漸饒裕至曾孫遂狀元及第至宰
相卽文定公也嗣是累世簪笏不絕文定賜塋在儀
真子孫歸葬句容大村者甚衆

興化李長科小有喬世臣嗣京少文胞兄弟也皆以
文名其父卽文定公之孫一日行龍潭山中夜夢神
告曰明日賜汝墨二丸汝子功名盡在此墨藏之勿
忽也旣覺不喻其故明日憩道左神祠神像宛如夢
中所見視神座下二墨在焉駭然再拜攜歸以賜喬
嗣京二子繼成進士鄉會二試皆用此墨未盡也喬

歷官兵部侍郎嗣京監察御史

六科都左右給事中給事中共二十四員康熙元年
後裁去左右給事中十二員六科止畱十二員改都
給事中爲掌印按水東日記公文承旨舊稱五府六
部都察院六科給事中景泰中李顯爲給事中強加
都字則知去都字爲復古制云

御門聽政冬春辰初三刻夏秋辰正三刻內閣部院
官率以昧爽齊集午門次至中左門稍憩乃入候於
乾清門外 駕出陞 御座六部都察院等衙

門以次奏事如初一日首吏部則初二日首戶部周

而復始若宗人府奏事則恒居部院之首三法司例
居第三部院奏事畢然後臺省官奏事既畢然後內
閣大學士學士至 御前承 旨翰詹 起居
注官滿漢各一員輪直立西楹下

葉文莊公盛水東日記備紀省垣督撫時僚友姓氏
籍貫先曾大父大司徒公歷仕錄亦然前輩敦友誼
念故舊如此今人以薄為道用心如此者鮮矣予官
京師三十年游更數署受同人之益不少暇日追憶
筆之簡冊亦欲使兒孫輩知之耳 遷祭酒後掌院學士遷少詹
事奉 命祭告後掌詹詹事
以未及共
事不具載

禮部尚書沙公澄

順治丙戌進士蓬萊人

梁公清標

崇禎癸未進士真定人以兵書大拜

黃公機

順治丁亥進士錢塘人以吏書大拜諡文僖

郝公惟訥

順治丁亥進士霸州人終吏部尚書諡恭定

龔公鼎孳

崇禎甲戌進士合肥人諡端毅

禮部左右侍郎王公熙

順治丁亥進士宛平人以兵書大拜

黃公機

見上

董公安國

奉天人

田公種玉

順治乙未進士同年宛平人

曹公申吉

順治乙未進士同年安丘人終貴州巡撫

禮部主客郎中劉廣國 順治己丑進士潛江人終漢羌道僉事

南廷鉉 順治丙戌舉人渭南人終松茂道僉事予撰墓誌

禮部儀制郎中曹首望 功貢豐潤人終蘇州府知府

主事侯杲 順治己丑進士無錫人終刑部郎中

顏光敏 康熙丁未進士曲阜人終吏部考功郎中

戶部尚書郝公惟訥 見上

梁公清標 見上

戶部左右侍郎劉公鴻儒 順治丙戌進士遷安人終左都御史

嚴公正矩 崇禎癸未進士孝感人

田公逢吉 順治乙未進士同年高平人終浙江巡撫

魏公象樞 順治丙戌進士蔚州人終刑部尚書諡敏果

于公可託 順治乙未進士同年文登人

戶部福建司員外郎程可則 順治壬辰會元南海人終桂林府知府

沈振豪 貢生山陰人

主事王如辰 順治乙未進士同年膠州人終廣西提學道僉事

戶部四川司員外郎佟湘年 奉天人終瓊州府知府

翰林院掌院學士兼禮部侍郎陳廷敬 順治戊戌進士同
年歷吏部尚書今

刑部尚書

葉公方藹 順治己亥進士及第終刑部侍郎加禮部尚書
諡文敏

國子監司業劉公芳喆 順治辛丑進士宛平人

詹事府詹事兼翰林院侍讀學士加禮部侍郎沈公

荃 順治壬辰進士及第華亭人諡文恪

郭公棻 順治壬辰進士清苑人終內閣學士兼禮部侍郎

禮部尚書兼掌翰林院詹事府事張公英 康熙丁未進士桐城人

詹事府少詹事兼翰林院侍講學士周公之麟 順治己亥進士蕭山人終通政使司通政使

盧公琦 康熙丁未進士仁和人終內閣學士兼禮部侍郎

田公喜霽 順治辛丑進士馬邑人終內閣學士兼禮部侍郎

都察院掌院事左都御史陳公廷敬 見上

于公成龍 奉天人兼管都統

協理院事左副都御史李公迥 康熙甲辰進士壽光人終刑部右侍郎

左僉都御史周公之麟 見上

兵部督捕左理事官羅公秉倫 康熙癸丑進士江寧人終通政使司通政使

勞公之辨 康熙甲辰進士石門人太僕寺卿

右理事官宮公夢仁 康熙庚戌會元癸丑進士泰州籍靜海人終福建巡撫

錢公晉錫 拔貢太倉人順天府尹

顧公藻 康熙丙辰進士崇明人由翰林院侍講改終工部右侍郎

督捕衙門例以每年四月彙題一年八旗逃獲之數別有綠頭牌奏知逃官逃兵若干員名止記總數以備問人名地名不能悉也而捧牌啓奏係滿洲堂官

專責

乾清門啓奏

上問侍衛馬三捷逃往何

處席珠不能對士禛又不解國語遂蒙

上諭下

吏部都察院察議堂司官左都御史于公成龍言綠頭牌啓奏漢官例不與聞與公無涉席珠公亦云然予曰不然滿漢堂官平日共事一堂又同啓奏小有利害輒分彼此既非大臣之體又非協恭之誼某不忍爲也于公與副都御史徐公潮深歎服謬許有古大臣風且云 本朝此事惟一見於魏敏果公象今乃再見公耳于公至內閣又申言之然予與席珠公等竟同一口供上遂俱議降一級畱任仍罰俸一年

蒙

聖恩予與漢理事官勞公之辨照部院議而

席珠公等三人皆降三級隨旗上朝吏部尚書李公天馥亦語侍郎彭公孫適曰王公不失厚道然未免過於忠厚吾所不能掌院學士張公英云公此一起居注諸公皆傳道之

李侍讀漁村

澄

滇行日記載板橋驛壁有題句云

滇海盈盈一水遙解鞍明日問歸橈還如謝朓宣城路南浦新林過板橋甚有風調不知誰作也按此升菴詩也題作于役江鄉歸經板橋首句千里長征不憚遙滇程記云楊林達板橋號三亭實六亭

克什兔者紅帶宗屬自四川隨征回京至鳳翔病疽危甚有張希仁者業瘍醫藥之而愈克什兔遂攜入京師張有子玉女蛇妃等九人克什兔利之私作偽契誣以賣身及張歸鳳翔克什兔卽以逃人告提比解至部讞得實予與席珠公斷張夫妻子女歸復版籍爲良民克什兔送宗人府察議克什兔怒牒訴掌宗人府郡王郡王召侍郎等辨質克什兔刁悍甚然緝於理府是部議克什兔革職鞭責疏上得旨依議予在部不敢以強禦毆法率如此聊記此一事不及備書也

湯尚書荆峴賦巡撫江蘇毀上方山五通祆廟撤土偶扑之而投諸水有人於地中得古石碣上刻肉山酒海遇湯而敗八字云仙人張三丰書也烏程陳煉師說

山東巡撫題報部撥陝西協餉銀九十萬兩已解本年地丁錢糧銀四十五萬兩其未解銀四十五萬兩儘征儘解奉旨陝西需用銀兩已將戶部庫帑撥給這未解協餉若不拘定限儘征儘解恐致累民着不必解送仍畱該省候部撥用同日戶部奉

旨西安鳳翔各屬二麥無收供應軍需賑恤民生俱

關緊要着將爾部庫銀撥一百萬兩作速解送陝西
支用先一日內閣傳 上諭諭九卿以 聖意
如此臣士禎恭對曰普天之下皆 朝廷赤子

皇上軫念秦民不惜公帑百萬朝發夕至起白骨而
肉之恩至厚矣又軫念齊魯之民停協解以紓民力
真天地父母之心無不覆載者也嗚呼 九重之上
慮周萬里宵旰憂勤惟懼一夫不得其所聖帝明王
憂民至此者古今能幾見哉忝備員九卿謹備識之
四月中屢 諭九卿會議西安鳳翔賑濟事宜十
八日內閣傳 上諭畧云西安鳳翔饑荒朕在宮

中夙夜軫念有從陝西往來人員必親加詢問頃四
川巡撫噶爾圖來京陛見問所過陝西州縣情形噶
爾圖奏稱西鳳二府百姓流亾者多以饑餒其疾疫
而死者亦間有之朕聞之不勝惻然云議得捐納人
員應令於布政司及西安鳳翔二府屬各州縣聽便
捐納仍特遣大臣會同該督撫不論捐納及撥解銀
兩并運送米石於被災州縣作速通行給發奉

旨着戶部尚書王鵠工部尚書沙木哈去先是遣兵
部尚書索諾和往勘災未回再有是 命

康熙丙寅睢州湯公斌自江寧巡撫

特旨加禮

部尚書召還掌詹時正詹爲清苑郭公棻二公同時
未幾郭遷內閣學士去不另推補及湯遷工部尚書
則以禮部侍郎掌翰林院事桐城張公英兼掌府事
張遷工禮二部尚書皆兼掌翰林院詹事府迄不另
推云

王翬字石谷自號烏目山人常熟人畫與太倉王太
常時敏王廉州鑑齊名江左稱三王辛未來京師頗
自貴重其畫不爲人作獨欲得予一詩爲贈屢屬諸
公通意於予又特作長幅及冊子八幅相遺其意濃
至可感竹垞題冊後云王翬老去畫尤工小幅吳裝

倣惠崇曾上北高峯頂望村村風景似圖中八幅其
一倣大癡溪山雨意圖一倣王叔明小景一題夕陽
山外山倣巨然一倣趙吳興采菱圖一倣北苑一倣
黃子久天池石壁圖一寫唐伯虎詩意詩云吳山多
近打魚磯磯上家家住翠微曉日五竿人未起杳杳
山鷗遠簷飛又十月江南未隕霜青楓欲赤碧梧黃
停橈坐對西山晚新雁題詩小著行

海澱在明時有戚里李氏園米太僕仲詔萬鍾勺園亦
在卒卽葬焉暢春御園落成而米之墓逼近苑
外其家欲改卜上知之特傳旨令勿遷仍

許歲時上冢如常 上之曲體人情如此真盛德也

命九卿會議京口荊州截留漕糧令該駐防將軍以兵船各運十萬石至襄陽以西安鳳翔雨澤愆期秋成未可必也

內閣傳

諭九卿及翰詹卿寺各衙門堂上官書

嵩山中岳廟濟瀆神祠孟子遊梁祠二程子祠扁額各四字進呈曰嵩高峻極曰靈瀆安瀾曰昌明仁義曰功存河洛先是河南巡撫閣中丞與邦恭請

御書也

國子博士孔尚任東塘精於音律常得漢玉羌笛唐製胡琴各一枚形製古雅自爲跋刻之云康熙壬申官京師獲玉笛吹孔之下止具三孔世無識者考之馬融笛賦稱笛出於羌舊四孔京房加一孔於後以備五音所云四孔者乃連吹孔數之其底原有洞孔故加一孔而五音備焉後之長笛又加二孔以應七律許慎說文注笛七孔笛羌笛三孔是也其曲有落梅花折楊柳古愛其曲多爲玉笛吹之此笛色如柳花蓋古之甘黃玉也雙鈎碾製肖形竹節頂節二寸中節八寸尾節五寸較以漢尺分毫不爽應邵風俗

通載漢武帝時丘仲作笛長尺四寸今長尺五寸且無後孔當在漢之初年矣噫古器存而古音莫解笛之三孔亦猶文字之一畫也與右跋漢玉羌笛胡琴本北方馬上樂亦謂之二絃琵琶蓋琵琶所托始也南部新書載唐韓晉公滉入蜀伐奇樹堅緻如紫石匠曰爲胡琴槽他木不能並遂爲二胡琴曰大忽雷小忽雷後獻德皇樂府雜錄云文宗朝兩忽雷猶在內庫內侍鄭中丞特善之訓注之亂始落民間康熙辛未予得自燕市蓋其小者質理之精可方良玉雕鏤之巧疑出鬼工今八百餘年矣頻經喪亂此器徒存而已無

習之之人俗藝且然傷哉

右跋唐製胡琴

又嘗於慈仁寺市得

前代內府琵琶二賦詩曰喬木世臣事已革零書破

琴存故國每逢舊物重摩挲必詰此物何從得廟市

曾收兩琵琶

仄

琵琶製作不同各臻極其一龜錦裏周身

剪犀鏤牙如縷織背上雙紐蹲盤螭盈尺曲柄玳瑁

飾雲楸作面波濤生三十六峯更奇特橫挾不起斜

按難滿輪明月遮胸臆其一瘦削美人肩螳螂匙頭

蜻蜓翼水波雷文到四邊碎砌檀槽百衲式異寶妝

成兩樹花牡丹秋菊真氣逼不似螺蚶非碑磔剔殊

填漆無顏色次第傳觀反覆猜旁有老伶長太息前

朝琵琶屬教坊玉熙宮中數承直方響前列琵琶隨
一派韶音揚舜德先皇顧曲愛繁絃天府之藏示樂
職大者名爲大海潮南宋流傳今到北四絃彈動殿
殿庭却疑腕中萬斛力小者斲從萬曆初內府金錢
費千億年年風露催白頭才人懷袖聲啾唧聽來恰
似秋蟬吟針鋒細字將名刻大聲宏亮小聲清雄鳴
雌和無差忒龍錦囊中只兩張舊時中侍皆能識可
惜淪落在市塵四十八年塵漬黑折軸斷品誰安排
玉帶銀撥漫拂拭有腹無絃訴怨難撫今懷古中心
惻造者前王毀者誰甲申三月遭流賊

右詠大海潮小
吟蟬兩琵琶歌

徐宗伯學謨冰廳劄記云毘陵唐荆川順之始以宮
僚言事削籍海內有景星慶雲之望繼倭亂江南趙
文華薦之朝起南兵部郎轉北至京朝士爭往候之
荆川闔門謝客客至常不得見及報謝自九卿外庶
僚惟翰林科道吏部而已是時分宜當國久勢傾中
外欲借荆川爲名高日令其子置酒致款洽荆川儒
者一見隆重遂爲莫逆以謂可附之行道不知入其
牢籠也巡邊之役分宜享之西苑直房飲以薏苡酒
荆川以爲佳分宜曰酒故薊遼王總督餽予酒則一
年佳一年官却一年不佳一年荆川領之至薊欲馳

總督甬道王公自以帶兵部堂銜難之荆川殊怏怏
還朝先以巡邊疏稿託白儀制啓常呈世蕃內叅王
公至數百言世蕃覽之大驚曰此疏入王公械逮矣
乃以筆盡刪去止畱一卒不練誠如聖諭云四句乃
得秋後處治之旨朝論以薏苡酒之語謂荆川爲嚴
氏報効此其故不可知矣如宗伯所言王司馬思質
之獄發指雖由相嵩荆川實爲搏擊何殊文華之媒
孽張半洲耶李中麓開先荆川至交也常遺之書曰此
一起官頗紛物議出非其時託非其人將舉平日所
守而盡喪之矣又云或佛肸欲往之意也豈知其終

是不可哉蓋良友之言如此

大興劉顯績字元公明崇禎丁丑進士順治初官給
事中終陝西僉事有知人之鑒前明崇禎癸未會試
爲同考官得大學士成公克鞏刑部尚書諡端恪姚
公文然學士魏公天賞順治丁亥會試再爲同考官
得大學士王公熙大學士李公之芳太常卿一甲第
二程公芳朝修撰一甲第三蔣公超而四川按察使
宋公琬詩家宗匠亦本房也視朱平涵相國湧幢小
品所載吳中丞維嶽以嘉靖丁未分考得張相居正
殷相士儋陸尚書光祖汪侍郎道昆胡太常正蒙胡

又會元也前後可以方軌然劉得人二次尤奇

士禎以順治辛卯羈貫中山東鄉試是科同考得人

極盛者餘杭孫應龍海門以德州知州閱書經得七

人為安丘曹澹餘申吉吏部侍郎大嵩李望石贊元

榜名立兵部督捕侍郎樂安成愚崑其範兵部侍郎鄒平

馬右實光監察御史平度崔老山誼之通永道僉事

禹城盧公鉉鑄鼎淮安府推官膠州韓名卿魏衡州

府通判七人皆登進士李成馬皆嘗以御史巡鹽而

成與馬又皆兩浙孫之桑梓也時年七十餘家居尚

無恙士禎以詩經出壽州夏侍御敬孚先生人之門

忝冠本房

初擬解元改第六

今官經筵講官刑部尚書安丘劉

子延祚遠巡撫順天副都御史日照李宗周簠官知

縣子應薦內閣學士兼禮部侍郎抑亦其次今先生

年七十九矣清健如五十許人

今吏部尚書李容齋天馥禮部尚書前大學士熊青

岳賜履兵部尚書杜肇余臻刑部尚書前吏部尚書

陳說巖廷敬皆順治戊戌進士同時領六卿前此所

少

長洲宋文恪德宜善擇婿王藻儒揆內閣學士兼禮

部侍郎顧懿樸藻翰林侍講改兵部督捕理事官顧

雨若用霖西充知縣陳廣陵元龍翰林編修李丹壑
孚青翰林編修五人皆進士其四入翰林文恪子大
業亦翰林編修

上海姚公永濟字通所明萬曆戊戌進士歷官浙江
左布政使至順治十五年戊戌尚無恙與戊戌新進
士敘同年之誼時人傳爲盛事先是崇禎中先祖康
宇公官浙右轄與姚公共事相得甚懽姚公丁丑入
覲以考課不及額下詔獄先公署篆悉以徵解完姚
公考成遂得復任率子孫詣先公謝曰活我者公也
鼎革後先公出居尚無恙辛卯外兄高念東珩以翰

林侍講學士典江南試先公附書問訊姚公答書殷
勤道契關士禴是秋領山東鄉薦猶及見之先公是
歲壽九十一又二年癸巳考終後五年爲戊戌姚公
尚在蓋近百歲矣

明彭吏侍華爲庶吉士其兄文憲公時以學士教習
然猶三從兄弟康熙癸丑崑山徐宮允秉義果亭以
鼎甲第三授編修入館其母弟相國立齋以翰林掌
院學士司教習具疏題明 特旨免秉義教習曠
典也乙丑會試華亭王戶侍鴻緒儼齋爲總裁其母
兄編修九齡爲同考試官尤爲僅見

李少司馬厚菴言在江淮晤督學許贊善汝霖傳治失血方云高郵一學官年八十二有少容自云少患血症得異人傳此方服之良愈久服老而益健其方用青布不用五梧子者於荷稻或草木上接秋露最潔者取其水以磁甌盛之分爲十八碗作三次服每次六碗入人參湯五分冬蜜人乳各一鍾煎溫服

李少司寇奉倩言得一秘方治疫氣傷寒等症最効其方用麥門冬三錢烏梅三枚棗三枚芫荽梗三十寸燈心三十寸竹葉三十片熱煎服厚菴扇繫一物色如伽楠而不堅無香問之曰粵西

梧州所產鯖魚膽也用少許和水點眼疾立効然不必多用又粵西山羊血治血凝滯如神其家一僕偶墜船底船深丈餘及救甦遍身血暈療之漸痊惟頭目岑岑作苦旣三年矣偶得山羊血治之頭風立除南工侍懷仁大西洋人嘗言其國取珠有如雞卵大者螺蚌亦絕大有臭腐者則夜明珠產其中其法不用剖取惟以殼曝日中久則蚌渴吐珠弄之伺其吐急取可得

晉江黃給事熙纘字儼菴嘗爲安慶府推官予與順治庚子同爲江南同考試官以己亥城守功內擢其

僕人一日得大螺將煮食之湯忽沸有聲甚巨螺忽自釜躍起室內氣如烟霧不辨人皆驚而走匿移時視之螺死有珠如龍目大在其側以經水火晶光遂減秤之重三錢亦夜明之類

李厚菴說明末閩中神祠土木偶及人家祠木主皆起自行

少司空齊稽公言察兒罕國元之嫡派也世雄長西北諸部傳至靈丹可汗在位久忽欲往西域皈佛教其合吉那顏等苦諫不聽國中無主

太宗皇帝發兵追降之其尚璽近侍以傳國玉璽倉卒坎地

而羶之兵既退有童豎牧羊其地一羊屢至坎所蹄之不已驅之復來牧覺有異試發土則璽見焉闢於官遂進上時天聰某年也今藏御府予按何文

蕭喬新椒丘集有傳國璽志一篇敘述甚詳五代後唐從珂時秦璽燬石敬瑭人洛更以玉爲之重貴獻之遼興宗試進士遂以有傳國璽者爲正統命題金滅遼延禧遺傳國璽於桑乾河元世祖時有札刺爾氏者漁於桑乾之濱得之夜有光監察御史楊桓辨其文以爲歷代傳國璽上之至正末中山大兵至燕順帝攜之北遁沙漠其本末如此以文肅言考之自

五代之亂璽歸於遼遼歸於金金歸於元在蔡爾等
國者又二百餘年而歸於 本朝詎偶然哉又按至
冕詩青象不將傳國璽紫駝空引舊氍毹蓋未詳矣
門人楊吉士名時江陰人向屬其訪宋胡恢南唐書
及元席帽山人王逢集邇來言胡本李忠毅公仲達
家舊有之亂後其家零落不可得矣原吉逢寧也梧溪集
凡七卷有至正間新安江澤民鄱陽周伯琦三序景
泰申南康府知府陳敏政後序細書工緻似鍾太傅
終卷如一云是周硯農樂起手錄周江陰老儒常熟
毛子晉刻較古書多其刊正尤精六書之學其子

源字鄴侯予在淮南時從遊門下甚久硯農年八十
七乃卒今歿才五六年耳書雜八分信可寶也女禧
祐皆工畫禧名尤著予昔在江南嘗得其畫惜花春
起早詩意士女一幀又嘗屬江陰知縣陸次雲訪其
所畫楚詞九歌九章圖陸在江陰數載不相聞聞已
購得裝潢而未寄予也當問之

吳中閨媛文俶字端容寒山趙靈均之配工於寫生
梁谿太學浦生貽其所作花卉草蟲十二幅雅淡有
生氣昔聞有著色本草一部惜未見

米南宮寫陰符經墨蹟細行書結構精密神韻溢于

楮墨與世傳刻米書迥別大似褚河南也首有黃帝
像兩童子奉劍印侍前有一鼎後題甲申初夏廿日
南山米老學書課凡十三字經後書元章及劉巨濟
倡和龍真行二篇字尤妙云龍真行爲元章待制林
公書跋云祕府右軍書一卷有一龍形真字印故作
米芾 龍形真字芸香裏伏日道山聊一啓媪來
鶯去已千年莫怪癡兒收蠹紙蕭衍老翁食無肉錦
質繡章能獨侈不知劫火付冤家却誤□仙求令史
文皇有金無鑿目賴取穹官齊押尾徐生小黠辨茅
簷不道天真難力至晚薄功名歸一戲一奩充勝三

公貴牡丹不語人能醉墨光覺勝朱鈿媚與身俱生
無術治又染膏肓劉巨濟

劉涇和秦火蕩焚天地赤孔堂壞後無餘壁不知科
斗六書文化作龍蛇二王跡集賢他日作仙久官姓
篆章存歷歷自憐黃眼未親逢一段因依徒奪魄元
章揮灑早驚動秘篋墨皇曾敬識孤標未要後生知
劣許下官論莫逆好奇舉世不多肯神物尤來終變
易神鋒雙合會有時真璽一飛無處覓頗聞秘篋作
訛語別有擾龍招異客不如乾沒歸去來勝在箇家
遭水厄 芾自命此書爲跋尾書惟題于家真蹟後

不寫以遺人 樞密太尉論書詣奧前篇有天真難
力至語後篇知劉佺收書自芾始故寫獻 後有跋
云米氏小錄云宣和間聖主命寫小楷故倣右軍黃
庭少酬聖意不能以備御覽也余畱京師購得此帖
命工裝潢與諸子習書誠可寶愛堅白老人敬題

居易錄卷十八終

居易錄卷十九

濟南 王士禛 著

虞山錢牧翁謂梧溪集記宋元末國事人才多史家
所未備予讀之信然又如宋高皇壽成殿汝鼇鱓引
孟郡王忠厚佩印歌制置彭大雅瑪瑙酒椀歌之類
尤令觀者一唱三歎予最愛其題王冕墨梅一絕云
霜落銀河月在天美人松下鬪嬋娟一枝倒影吳牛
角曾似知章踏酒船自序云冕者畫梅常羈牛遊京
城名貴側目

兵部員外郎裴泰新安人假歸將行以其邑訓儀封

王世治所刻吳江計甫草 東 讀予論詩絕句記來徵
士大夫詩歌紀事以計此記爲予詩作也因先呈予
世治跋云不肖生也晚距先肅敏公六世時已百餘
年守家藏集恒虞失墜有莫爲之後之懼康熙壬戌
七月太丘王瑗郵致甫草計先生讀阮亭詩記一篇
世治讀之不禁涕洟深歎知己之難而相遇之奇也
世治半世俯首老諸生不能與當代賢士大夫挈長
比藝焜耀先澤而甫草乃從阮亭王公少谷山人之
句而致其感動痛哭之辭至欲爲先肅敏死斯亦奇
矣嗟乎是少谷阮亭兩公之知先肅敏而總藉傳於

計先生之一痛也海內文人其誰不願爲計先生死
者哉予康熙癸卯在揚州一日雨行如臯道上得論
詩絕句四十首蓋倣元裕之作其一云三代而還盡
好名文人從古善相輕君看少谷山人死獨有平生
王子衡甫草丁未於都門見此詩因作記今載甫里
集泰字廬院康熙甲辰進士以溧陽知縣行取循吏
之聲甚著爲督捕司屬予擬薦之未果

席帽山人集載台州余季女寄夫詩五章云妾誰怨
兮薄命一氣孔神兮化生若甌春山娟兮秋水淨秉
貞潔兮妾之性 一 夜夢兮食梨靈氛兮爲予占之曰

行道兮遲遲斂角枕兮粲如風動幃兮心悲二雲黯
黯兮雪飛棘夫子介兮如石苦復留兮不得望平原
兮太息涕泗橫兮霑臆三送子去兮春樹青望子來
兮秋樹零樹有枝兮枝有英我胡爲兮熒熒四織女
襲兮病偃在牀嗟嗟夫子兮誰與縫裳五右詞旨悽
婉音族古雅不減徐淑誰謂宋元以下無樂府耶得
之女子尤奇

睢州湯尚書荆峴斌醇儒也仕至開府九列而家甚
清貧居京師委巷陋室冬禦寒一羊裘外無長物尚
書歿後有僕劉振者鬻身旗下一日赴部告提妻子
云在睢州生員湯溥家司具稿呈堂欲爲行提予不
可曰彼自言因負債典身湯氏年滿復鬻身旗下烏
知非賣身於湯而背主投旗者乎行提則墮此輩計
中旣索妻子又將索衣物索路費不滿其谿壑不止
且背主投旗自有應坐之律主僕名分地方風俗關
係甚鉅豈可自此一事開其端耶遂諭司改稿遞發
劉振令河南巡撫嚴行質審有無背主投旗情節閣
中丞與邦審擬得情照例治振罪仍斷與湯氏爲奴
而開歸諸郡背主覬覦者懼矣溥者尚書子也

新城民牛德者鬻身及妻女於旗下逃歸十餘年矣
一旦爲有司獲解自供子女幾人有司復查解到部
而長女次女皆已適人有司來請明示按條例長女
係旗下所生帶逃應提解次女係逃後民間所生應
追身銀四十兩解部給主予以提解則夫婦離異方
難之其旗主李文士者忽具呈自言不忍其女夫婦
斷離人與身銀俱不願領祈行知地方官各令寧家
永無改悔予驚歎曰世乃有如此人乎陰德大矣其
後必昌亟面加獎勵准行而二女皆安室家矣文士
之義不可使湮沒無傳也特表而出之

安丘張杞園

貞

以明經需次翰林孔目博雅好古工

篆刻喜交遊青州名士也以寫本宋岳珂肅之玉楮
集相寄集八卷有嘉熙庚子自序肅之鄂忠武王孫
霖子官戶部侍郎著書甚多如金陀粹編程史愧鄰
錄皆傳於世又有東陞事略未及見此集乃衡府高
唐土家鈔本流傳絕少高唐王諱某號岱翁工篆隸
癖嗜古書寫錄多祕本鼎革後散落市肆紙墨精好
裝潢工緻康熙乙巳予歸自揚州一日至青州與杞
園觀書市中得劉貢父春秋權衡意林二書亦高唐
府中物杞園云曾見岱翁篆書入藥鏡一篇淳整茂

密亦希有也

戶部郎中王挺以其遠祖孝行錄索題孝子名原文
安人父珣以逃里役去鄉里原方在襁褓稍長有室
段氏日問母張兒父安在母告以故原哀痛跪母前
欲遠遊覓其父母止不聽乃去之齊魯數年至田橫
島宿神祠夜夢入古刹日當午見僧方炊就乞食僧
與之一盂曰此莎米飯也味苦爲汝和以肉羹旣覺
有一丈人攜杖入原告之夢丈人曰日當午南方也
莎草根附子也和以肉羹附子膾也急去當於山寺
求之原謝而行抵輝縣入帶山夢覺寺會大雪宿山

門下僧見而叩所從來具以對是時珣在寺爲僧都
養僧引原示之曰此少年亦文安人試作鄉語於是
父子語合抱持大哭聚觀者皆感動泣下住持僧法
林者贈詩云豐干豈是好饒舌我佛如來非偶爾昔
日曾聞呂尚之明時又見王君子借畱衣鉢種前緣
但笑懶牛鞭不起歸家日誦法華經苦惱衆生今有
此原遂奉珣以歸年六十有四矣又二十年始卒原
卒時亦八十有四子六人孫十五人曾孫二十二
人應霖應期皆進士李本寧維楨李卓吾贊皆爲之傳
其大略如此六世孫景祚

本名龍祚以避
東宮廢名易今名

字迂叟順治丙

戊進士官大理卿挺卽廷尉子也

門人太原閻詠字復申其父若璩字百詩遂於經術博雅好古詠寄予書云此間有一僮父自謂精通小學問詠今代詩人誰爲第一詠以吾師新城公對渠云吾家少陵詩賓客減應劉應爲人姓當讀作平聲何新城公作仄聲用詠不能對歸質家尊家尊云皆可用也此字正爲左傳國語應爲武王之子所封之國陸氏宋氏無音故黃公紹韻會於蒸部應字曰人姓陰時夫韻府於徑部應字曰人姓非平仄兩用之證乎亦猶吾鄉之枚乘漢書無音故子美作仄聲枚

乘文章古是也太白又作平聲八月枚乘筆是也安得是李而非杜是杜而非李乎伍子胥之員讀作運亦讀作云故陸魯望詩賴得伍員騷思少未聞以令公四俊之謠而病其不識字也新城公博極羣書作詩字字有根據豈容輕議議之者所謂蚍蜉撼大樹耳徐自笑曰吾作新城公桓譚得否百詩博聞強記漢唐注疏皆能舉其詞此其緒餘耳然予詩用應劉只作平聲彼云作仄用者不知其何據也

從來辨夏正周正者幾成聚訟百詩近著博湖掌錄有改歲改時改月解一篇最博而核聊記於此云事

有爲當代所通尚習聞習見隨人舉及言下輒知此屬某彼屬某不復煩疏解者三正之通於民俗亦其一也予嘗以豳風七月詩言月夏正也言日周正也周禮太宰小宰正月建子也正歲建寅也一篇一官之中已交錯言之然猶曰字有不同也若何以卒歲夏正之歲也曰爲改歲周正之歲也月令季秋曰來歲秦正之歲也季冬曰來歲夏正之歲也十月蟋蟀入我牀下夏正之十月也十月之交朔日辛卯周正之十月也臨封至于八月有凶商之八月也玉藻至于八月不雨周之八月也月令孟春乘鸞路夏之孟

春也明堂位孟春乘大路周之孟春也臣工詩維莫之春周之暮春也論語暮春者夏之暮春也明堂位季夏六月改時與改月也左傳襄十四年正月孟春不改月與時也君牙夏暑雨冬祁寒不改時卽不改氣者也雜記正月日至七月日至改月却不改節者也左傳昭十七年當夏四月建巳也於商爲四月建辰也武成惟四月顧命惟四月建卯也郊特牲歲十二月孟子歲十二月建亥也伊訓十有二月三統歷商十二月建子也夏小正十月二月凌人十二月建丑也四代之制連類錯舉昭昭別異然猶曰書有不

同也若曾子一人口中病于夏畦夏夏之夏也秋陽以暴之秋周之秋也趙岐註周之秋夏之五六月盛陽也郝仲輿曰周以五六月爲秋陽光燥烈金遇火伏暴之極乾也夫以暴物極乾言有不須午未月之陽者乎同一絳縣人之生正月甲子朔在晉爲七十三年在魯則七十四年也同一史蘇之占六年逃明年死在晉則合在魯中隔一年也所以者何用夏正與周正之不同不惟此也昭元年正月趙武相晉國祁午曰於今七年及至秋醫和曰於今八年所以者何昭元年正月仍晉平公十六年十一月昭元年秋

則晉平公十七年之夏或秋也以至三統歷殷十一月戊子後三日得周正月辛卯朔周正月殷十二月洛誥傳以十二月戊辰晦到明月爲夏之仲冬夏仲冬周孟春漢古詩明月皎夜光一篇玉衡指孟冬漢以十月爲歲首此孟冬乃建申之月指改時而言下文秋蟬鳴樹間爲明實候故以不改者言唐儲光羲詩夏王紀冬令殷人乃正月則又和盤托出楊升菴曰唐人不辯而自了然也惟宋儒始生異說明人出而益滋妄解矣

近所聞見異姓再筆於此漢有屋椽宋有愷實姑蘇

志科第表宋有侍其璋崇大年順德府志職官表有
塵洪堂昭賞璫科第表有撤大經只好仁尼登紅慶
烈女要氏長葛志有義敬聰芳東陽志有點舄新城
志有彪準章丘志有部文華及恩木管訾鬲襲類德
繩郇勾絮善能盈匿付太俎昊乙禡隆鑒書等姓癸
未齒錄藺完理妻叱氏丙戌題名錄青伯昌洛陽人
近科齒錄有香氏戰氏三仕一得云臨淄有泊姓宣
城有後姓平陽府有恭姓癸酉吏部選人有秀姓直
隸巡撫爰書有耳姓南皮婦人氏氏山東巡撫爰書
有帖姓牙姓稅姓督補文案有嵩氏戶部文案有芟

氏牙姓上姓讓姓野姓細姓鎮姓行姓改姓穰姓冬
姓賣姓買姓擺姓麗姓念姓容姓甄姓馮具區集有
職姓彭少宰僕蕢姓勞書升通政云督學山東時書
生有酒姓字姓賢姓又戶部文案有縱姓蹤姓布姓
腰姓倉姓朋姓資姓穰姓伯姓拜姓茂姓延綏鎮志
有守備匙北鑰希勝蛟又汝州志有雍大噐怯迅然
魯山志有長可舉斐興廣撫疏有閉聚秀彭少宰羨
門云弘治間進士有不負恩陝西有荔姓當是荔非
之後圖繪寶鑑有跋異汧陽人又交河人雪案又寧
夏衛守備燮化元

趙叔向肯綮錄列子九方臯善相馬九姓方臯名

本朝會試自順治丙戌至康熙辛未已歷十八科

巳亥其登內閣九卿督撫三品者惟丙戌乙未二科最

盛丙戌大拜四人傅聊城以漸李文勤霽魏栢鄉喬

介馮文毅溥尚書八人沙宗伯澄高司寇景傅司空

維鱗冀司空如錫朱司空之弼艾司寇元徵魏敏果

象樞劉端敏捷督撫尚書三人袁清獻懋功朱河督

之錫林漕督起龍左都御史二人劉遷安鴻儒侍郎

十五人李宗伯奭棠石司農中張司寇爾素陳司農

協王司空天眷胡少宰兆龍少宰清寬梁少宰清

遠田司農六善楊司馬時薦干司寇嗣登朱司農裴

李司馬棠馥楊司空運昌王司農度左副都御史一

人董洛陽篤行巡撫右副都御史一人張闔撫汧通

政使二人晉洪洞淑軾劉羅山士蘭大理卿一人王

文安景祚本名亂祚內院學士一人夏蓋州敷九

乙未大拜一人朱文恪德宜尚書三人王司農日藻

王司農隲陳文安鼓永侍郎十二人史宗伯大成田

宗伯種玉王宗伯澤弘胡少宰簡敬于司農可託嚴

司農沆王司農遵訓暨不佞士禎孫司馬光祀楊司

馬雍建李司馬贊元梁司空鉉左副都御史一人徐

武進元珙總督侍郎二人徐清獻旭齡慕漕督天顏
巡撫侍郎三人田浙撫逢吉劉東撫芳躅曹貴撫申
吉巡撫副都御史二人劉直撫祚遠伊雲撫闢內閣
學士一人綦高密汝楫通政使一人楊臨清彙太常
卿一人洪南安士銘太僕卿一人蔣丹徒寅國子監
祭酒一人馮涿州源濟蓋丙戌龍飛首科卽乙未極
盛不能及也後王宗伯澤弘與予亦至尚書

六月十六日滿洲內閣部院赴暢春苑啓奏

御

賜大學士伊桑阿阿蘭泰吏部尚書庫勒納各

御書扇一庫勒納公得素扇詩云亂陰堆裏結茅廬

已共紅塵跡漸疎莫問野人生計少廳前流水枕前
書未書錄唐山中前有小壘文曰淑芳後有小壘文
曰含英咀華

王太史肯堂字泰金壇人恭簡公樵之子初太夫人
與恭簡各處者已十年一日大風雨公畱宿已而遂
娠太夫人惡之兩取墮胎丸墮之不下將再市藥肆
中人夢神告曰若更予墮胎丸災必及汝詰旦市藥
乃不敢予及太史生兩丸在兩握中宛然所著證治
準繩律例考筆塵諸書皆盛傳于世

予於唐文最喜杜牧牧之孫樵可之以爲在翺堤之

右樊川集家有舊刻本可之集止見毛本壬申六月
偶過慈仁寺得金陵舊刻有謝兆申跋云是集得之
南昌宗侯慎學攜之南北數歲矣頃與王相如校刻
以傳同好萬曆四十一年癸丑有王文恪鑿序云是
內閣秘本手鈔以歸者王名若

壬申日九卿集議運大同米十萬石往西安府自大
同陸運六百三十里至裴家川口及湖灘入舟先是
命郎中常住等往船塢造船至是戶部議陸運車價
疏上事下九卿會議

特旨起外轉御史李時謙爲陝西督糧道叅議仍令
作速赴任

副將王國憲嘗爲台灣叅將言其地無橘柚荔枝龍
眼之屬如北地蒲桃蘋婆桃杏梨李之類皆無之有
果曰番蒜五月熟大如蘋婆味甘香多津液樹大而
葉圓又有果曰黃來去聲八月熟長可尺許味尤甘香
其樹類蕉實生節間多筍竹如粵中多猿多野牛無
虎豹

台灣多番民呼中國人曰唐人亦如荷蘭暹羅之謂
唐人也婚嫁不以媒妁男女相悅以檳榔相授受然
後歸告父母女子塗髮及面臂皆以鹿油男女皆跣

足市肆猶用永樂錢云台灣府無城別有城在其西
南曰紅毛城鄭氏僭竊時宮殿在焉今設叅將一員
統兵三千駐之距台灣二十里
台灣多野牛千百爲羣欲取之先置木城四面一面
爲門驅之急則皆入入卽扃閉而饑餓之然後徐施
羈勒豢之芻豆與家牛無異矣

賜大學士伊桑阿洋扇一

御筆楷書唐人朱慶

餘詩云林居向晚饒清景惜去非關戀酒杯石淨每
因杉露滴地偏漸覺水禽來藥蔬秋後供僧盡竹杖
淅中望月迴紅葉閑飄籬落迴行人遠見草堂開前

亦用漱芳小璽後二小璽文曰正心誠意

賜大學士阿蘭泰素扇一

御筆楷書唐人方干

詩云東南雲路落斜行入樹穿村見赤城遠近常時
皆藥氣高低無處不泉聲映巖日向牀頭沒濕燭雲
從柱底生更有仙花與靈鳥恐君多半未知名

吾邑耿太淑人徐氏長山人巡撫僉都御史以貞孫
長治知縣繼志女陝西叅議耿公鳴世之配巡撫浙
江僉都御史庭栢之母也幼讀書工詩偶記數篇於
此寄子中丞云家內平安報爾知田園歲入有餘資
絲毫不用南中物好做清官答聖時輓王烈婦畢孺

人先叔祖翰林
簡討象節配

云烈矣王門婦賢聲著帝京貞心同玉潔
素質宛冰清取義丘山重捐生一羽輕恩承明主詔
千載播芳名偶成云時近清明二月天嬌花粉竹正
鮮妍秋千架上人如玉溪水堤邊柳似烟紫燕飛飛
歸畫棟白鷗點點浴晴川年來景物還依舊不見人
生再少年其篇什最多壬午亂後盡散佚矣
予舊爲潛江門人朱載震悔人題小竹山人王叔楚
畫竹卷云茅齋青壁幾年成谿路無人略約橫一夜
春雷動崖谷四山風雨釋龍驚爾時但愛其畫之瀟
灑亦不詳叔楚誰何也讀徐宗伯叔明海隅集有王

山人墓銘乃知爲吳嘉定之羅溪人名翹字時羽一
字叔楚幼嬉戲圖繪兼解唐人韻語已棄諸生爲山
人詩宗孟郊山水宗米芾間出新意尤工草蟲與竹
不甚靳惜其技有求輒應之酒酣濡筆無不滿意去
人以其易購無致重賄者卽有得旋散斥之性骯髒
不喜媿阿貴勢人以故名不出闔闔比老性益卞急
有召而饗之饗者已布豆而主弗見也山人怒罵曰
而將尸予耶覆豆而出隆慶壬申年六十八卒婁堅
子柔敘其先友亦有叔楚名
牧齋貶空同滄溟二李先生至矣吳人之師友二李

者如徐廸功黃五嶽以及弇州皆絕之於吳且夷廸
功於文璧唐寅之列比之明妃遠嫁一日閱馮時可
元成集辯徐太室二羅集序云吳詩清淺而靡弱不
以二李劑之而何以詩哉元成吳人也其言如此天
下後世其又可欺乎牧翁稱文徵仲詩近同年汪鈍
翁注歸熙甫詩人之嗜好實有不可解者付之一笑
可矣

渾脫之義予向詳之皇華紀聞閱李中麓

開

太僕塞

上曲一首云黃河萬里障邊隅點鹵年來謀計殊不
用輕帆并短棹渾脫飛渡只須與與朱秉器中丞河

上格談所記略同李自注云脫音駝然後知渾脫皆
渾脫帽皆當作平聲也

戶部尚書王鵠工部尚書沙木哈自陝西賑濟回京
奏賑過饑民三十萬共支過銀二十二萬兩有奇

上命內閣出問九卿以宋富弼知青州活饑民至
五十萬今朝廷殫力賑救止活得三十萬人其故何
也對以史舉成數而言今則冊報實有此數耳

以太僕寺卿嚴曾架爲通政使司通政使

通政使羅蒙倫以艱歸

七月二十八日九卿百官送

駕于神武門外是

日駐驛昌平州溫泉

八月初五日調補兵部督捕右侍郎王士禎為戶部

右侍郎戶部右侍郎徐誥武以疾卒于位

欽天監疏請頒時憲曆於蒙古諸國仍載諸國名於曆首事下部覆准行

以內閣學士兼禮部侍郎王國昌為兵部督捕右侍郎

郎以太常寺少卿李應薦為內閣學士兼禮部侍郎

李前左春坊掌坊庶子也是時漢人內閣學士凡四人

起前工部尚書翁叔元為刑部尚書刑部尚書陳廷敬以外艱歸

詔停今年秋決其矜疑者仍令具題減等發落

九月十三日百官迎駕于東華門

九月二十一日未時經筵經筵講官滿禮部尚書

顧八代兵部尚書索諾和禮部左侍郎兼太常寺卿

席爾達右侍郎多奇漢吏部尚書李天馥禮部尚書

熊賜履兵部尚書杜臻工部尚書李振裕吏部右侍郎

郎兼翰林院學士彭孫適戶部右侍郎王士禎翰林

院掌院學士兼禮部侍郎張英侍內閣九卿起居

注給事中御史侍班兵書索諾和杜臻講天地之道

可一言而盡也一節禮侍席爾達學士張英講尚書

洪範貌曰恭五句講畢賜宴太和門

二十五日卯時東宮會講內閣九卿等侍班滿

禮部尚書顧八代漢翰林學士兼禮部侍郎張英講
君子義以爲質章滿左春坊左庶子艾肅漢翰林侍
讀學士李鎰講周易謙卦謙尊而光二句講畢 賜
茶文華殿門

十月初四日未刻戶部右侍郎王士禛接出 上
諭諭戶部陝西西安等處地方連歲凶荒繼以瘟疫
因而閭閻失業漸致流移 朕軫恤民艱焦勞宵
旰自去歲冬月以來頻發帑金蠲免正賦輓運積穀
轉運漕糧屢次特遣大臣察勘多方賑濟念國家所
重惟在養民目今秦省雖薄有秋收但民間匱乏已

極倘非格外加恩無以使積困盡甦轉徙盡復陝撫
所屬府州衛所康熙三十二年地丁銀米著通行免
征從前所有積欠未完錢糧亦着通行蠲豁務俾比
屋同沾實惠小民咸慶更生用稱 朕子愛元元
撫育安全至意爾部卽遵諭行特諭

初五日 駕謁 孝陵內閣九卿跪送於東華
門是日以吏部尚書李天馥爲武英殿大學士兼吏
部尚書

十五日 駕入內閣九卿跪迎於東華門

以禮部尚書熊賜履爲吏部尚書以翰林院掌院學

士兼禮部侍郎張英為禮部尚書

前禮書也

仍兼掌翰林院

詹事府事又兼起居注日講乃特典也

工部左侍郎年遐齡改兵部兼都察院右副都御史

巡撫湖北以左副都御史徐潮為工部右侍郎以通

政使司通政使嚴曾渠為都察院左副都御史僉都

御史宮夢仁為通政使左通政劉超凡為左僉都御

史

命內閣大學士張玉書刑部尚書圖納視高堰堤工

吏部尚書熊賜履往鳳淮揚三府徐州會同督撫清

查開河築堤建造閘埧栽柳田畝應豁錢糧并兩河

歸故中河告成後淤成熟地應陞科田畝允總河尚

書靳輔請也

以原任吏部右侍郎王封濬為禮部右侍郎

禮部左侍郎王履昌以病

予告
尋卒

總督川陝尚書佛倫上籌秦十疏其第七疏言湖廣

襄陽府有自襄江進小江口通陝西南州龍駒寨水

路一道自襄陽府至小江口二百四十里襄江大船

載運每船可八九十石至百石自小江口換小船至

河南浙川縣荆子關二百餘里每船可四五十石又

于浙川縣換小船至陝西南商南縣徐家店二百餘里

河狹灘多每船可載七八石自徐家店至商州龍駒寨二百里此段水路多灘險每船可載五六石至龍駒寨已上不通舟楫龍駒寨至西安府相距四百餘里中間有秦嶺藍關七盤等嶺則係嶺路有百里許臣惟小江口至龍駒寨雖係山河亦古來轉運河道但近代久不行運恐河道間有淤廢若此運道果能廣運楚米至龍駒寨積貯較之陸路輓運殊爲便易龍駒寨至省城不遠所積糧米自可隨時調度以備不虞奉 旨下九卿議覆准奉 旨命內閣學士德珠往會同查勘

內閣奉

旨問九卿詹事利道等故總河尚書靳輔居官如何對任事年久諳練河務 賜諡文襄

內閣傳奉

上諭諭戶部廣東竈丁竈地等項康熙二十二年額外加增銀一萬四千二百四十六兩零此項加增銀兩自今年起着免一半

禮部尚書張公敦復

英

言懷寧劉方伯尚志隆慶辛

未進士也年六十有三子皆成立一日諸子置酒上壽方伯忽顧夫人慨然曰吾雖有子三人然無足繼書香者奈何夫人曰相公年未爲老且精力猶健何不置姬妾數人廣亂嗣乎方伯笑領之夫人遂爲置

筵方伯六十後復生九子一女若宰中崇禎戊辰進士狀元及第仕至春坊諭德若宜丁丑進士官兵部職方員外郎若宰孫輝祖康熙庚午解元

改都察院左都御史于成龍為兵部尚書總督河道

總河新輔
病率于官

以總督漕運兵部右侍郎董訥為左都御史

康修撰對山作武功志文古事核厥後秦中士大夫撰郡邑志率矜式之故陝西諸志多可觀戶部主事葉晟以鄒縣知縣入為郎遺嘉靖中劉御史九經字豫吾所撰鄒志凡八卷訓詞爾雅有對山之風武功志列璿璣迴文詩圖鄒志列武侯八陣圖流馬法尤

可玩

劉萬曆壬辰進士

唐權文公德輿集五十卷

詩賦十卷文四十卷碑銘八卷議論二卷記二卷集序三卷贈送序四卷策問

一卷書一卷疏表
狀五卷祭文三卷

集賢殿大學士楊嗣復為序序云別有制

集五十卷湖南觀察使楊憑為序今不在編次之內

此集故友潁川劉考功公馘

仁體

得之梁谿顧孝廉修

遠宸家考功之子凡字元歎寫以見寄者凡丙辰進

士今知河南孟縣

竟陵胡瓌手寫其父石莊先生讀書說四卷釋志十

九卷相寄屬序其書亦申鑒中論論衡之流也石莊

名承諾明孝廉博雅工詩尤長於五言古選瓌大學

生亦能詩有寄予八詩極佳予編感舊集取石莊五
言頗多褒詩云未假新文充祕玩先將詩格入編題
謂此也

歐陽永叔致仕乞居潁終其身不歸廬陵前人議者
不一洪文敏二筆駁之尤詳略云歐公吉人其父崇
公葬於其里之瀧岡公自爲阡表而公中年乃欲居
潁其思潁詩序云逍遙於潁蓋無幾時惜無一語及
松楸之思崇公惟一子公生四子皆爲潁人瀧岡之
上遂無復有子孫臨之是因一代貴顯而墳墓乃隔
爲他壤予每讀之輒爲太息嗟乎此文不作可也此

言雖起永叔於九原不知何以自解於不孝之罪

上幸紅螺山遣內大臣明珠賚

御酒祭奠故大

學士諡文肅范文程及其子福建總督諡忠貞范承
謨

東武瑯邪臺上每晴明輒望見海外山林城郭髣髴
有人物車馬往來馳驟之狀不知其何地也然月僅
一二亦不恒見又城東廬山廬敖隱處有地市嘗有
士人數輩飲山巔俛見對面復有一峯形狀與廬山
無二方共訝之頃之幻滅乃知其地市也李侍讀漁
村云

二月初八日巳刻

御文華殿經筵經筵講官滿

吏部尚書庫勒納禮部尚書顧八代兵部尚書索訥
和吏部右侍郎傅臘塔禮部左侍郎兼太常寺卿席
爾達右侍郎多奇漢禮部尚書兼掌翰林院詹事府
事張英兵部尚書杜臻刑部尚書翁叔元工部尚書
李振裕吏部右侍郎兼翰林院學士彭孫適戶部右
侍郎王士禛禮部右侍郎兼翰林院學士王封濬侍
滿尚書庫勒納漢尚書張英講論語老者安之三句
滿侍郎傅臘塔漢侍郎彭孫適講周易咸卦天地感
而萬物化生聖人感人心而天下和平三句講畢

賜宴太和門

十五日巳刻

東宮出閣會講內閣九卿詹事府

官侍班如儀東宮講官漢禮部尚書兼詹事府詹事
張英滿刑部右侍郎兼詹事府詹事尹秦講志於道
一章漢翰林院侍讀學士李鎰滿右春坊右庶子努
黑講易大畜卦君子以多識前言往行以畜其德講
畢 賜茶文華殿門

山西巡撫僉都御史葉穆濟疏請旌表臨汾縣割股
孝子賈從淮奉 旨割股不准旌表久有定例葉
某并不詳查具題請旌嚴飭行

居易錄卷十九終

居易錄卷二十

濟南 王士禛 著

直隸巡撫副都御史郭世隆疏言宣府向設鎮道復
設十衛六廳并各營并分理錢糧驛務然廳員限于
佐貳營衛皆屬武弁予以臨民不特所用非其所長
亦且政多扞格各衛旣無漕運屯田之責以武弁而
膺民社之寄徵糧之責與官制終有未協宜裁六廳
七衛改設一府八縣庶文武均有職守軍民知所適
從下九卿會議如其所請奉 旨允行以宣府爲
宣化府倚郭爲宣化縣西城衛爲西寧縣萬全衛爲

萬全縣懷安衛爲懷安縣蔚州衛爲蔚縣懷來衛爲懷來縣赤城堡爲赤城縣龍門衛爲龍門縣

兵部軍政上命內閣傳 旨問九卿等各直省提

鎮賢否衆首推甘肅提督孫思克湖廣提督徐治都

頃之二提督與福建水師提督施琅皆奉 溫旨

褒嘉思克加振武將軍 上知人之明必孚衆論

如此

遣 皇長子往祭西嶽之神以陝西連歲災荒故也

以四月六日致祭仍 詔京官俱齋戒一日

禮部侍郎席爾達兵部侍郎朱都

納從

萬壽節禮

臣請

御殿受朝賀奉

旨云斷不可

行是日內閣暨九卿翰詹坊局諸臣赴暢春苑各進

書畫祝壽皆不納惟取古名人墨蹟入 御覽畢

仍發出

門人陳庶常汝咸遺其鄉前輩王厚齋應麟文集寫

本僅五卷明鄭真千之所輯厚齋宋末大儒常言今

之習舉業者苟沽名譽得則一切委棄於典章制度

漫不加省非國家所望于通儒乃假館閣書盡讀之

所著深寧居士集一百卷玉海二百卷通鑑地理考

一百卷困學紀聞小學紺珠六經天文編詩考等又

六百九十餘卷今多傳於世其集顧寥寥如此
元任士林句章集十卷萬曆中鄞人孫能傳鈔館閣
藏本至正四年浙江行中書省舊刻也卷首有趙松
雪撰誌銘王厚齋序士林字叔實與戴表元帥初齊
名所作謝翱吳思齊二傳最傳程篁墩宋逸民錄載
之他文或未稱是

倪雲林清閼閣集荆溪蹇朝陽所輯其八世孫理重
刻而以世系冠編首則其裔孫某所爲閱之噴飯按
譜一世爲漢御史大夫寬三世曰皓注官樞密院使
鄭國公四世曰朋官監察御史拜中書令六世曰嗣

祖官四鎮節度使八世曰承贊官叅知政事不知唐
宋官名何以兩漢已有之至二十二世曰思注乾道
進士蓋文節公也按文節六子祖仁祖義等而祖義
祖常最賢譜乃云二子鮑鮒尤爲不經且文節已爲
南宋人而譜在三十二世濤始入宋三十四世允清
慶曆四年應舉官至樞密使時代前後舛謬顛倒尤
可駭笑似是一不識字人妄爲杜撰而公然刻寘集
首異哉雲林二百年後乃有此辱

東阿縣魚山陳思王墓道有隋碑書法雜用篆隸八
分甚古今略其可辨識者載于此王諱植字子建沛

國譙人也洪源與九泉競深崇□□□□比峻自植
興□□□昌興焉其後建國開基□□□周室顯霸業
於東邾彰茅封於譙邑瓊根寶葉蔭芳蘭以莫朽軒
冕相傳襲縉紳而不絕此乃備頌典冊聊可梗槩而
言矣逮丞相參迺成王室道勳隆重位登上宰受國
平陽自茲厥後鳴鸞佩玉飛蓋交映祖嵩漢司隸太
尉公執掌三事從容論道美著阿衡之任不亦宜乎
父操魏太祖武皇帝資神龍虎剖判鬱以開基名頌
讖牒謠敵真人火運告終土德承曆援據圖錄享有
天下驟改質文馳遷正朔英雄之氣蓋有餘矣昆丕

魏高祖文皇帝紹卽四海光澤五都負辰明堂朝宗
萬國允文允武庶績咸熙正踐昇平時稱寧晏致黃
龍表瑞驗兆漳濱玉虎金雞恒綸宇宙王乃□內通
理愠淑哈英巖哲稟於自然博愍由於天縱佩金華
以邁四氣抱玉操以忽風霜綴贍藻於孩年攝首什
於孺歲尋聲制賦應詔題詩詞采昭灼子雲遙慙于
吐鳳文華理富仲舒遠愧於懷龍又能誦萬卷于三
冬觀千言於一見才比山藪思並江湖清辭苑苑若
藜荀之蔚鄧林綠藻妍妍如河英之照巨海武庫太
官之譽握促之噐者也但祿由德賞頻享皇爵建安

十六年封平原侯十九年改封臨淄侯都不以貴任
爲懷直量清雅自得常閑步文籍偃仰琴書朝覽百
篇夕存吐握使高據擅名之士侍宴於西園振藻獨
步之才陪遊於東閣皇初二年奸臣謗奏遂貶爵爲
安鄉侯三年晉立爲王詣京師面陳濫謗之罪詔令
復國自以懷正信而見疑抱利器而無用每懷怨慨
頻啓頻奏四月改封東阿王五年以陳前四縣封後
封爲陳王以讒言數構奸臣內興十一年裏頻頻徙
都汲汲無歡遂發憤而薨時年三十有一卽營墓魚
山傍羊茂臺平生遊陟有終焉之所旣而年代復遠

兆瑩崩淪茂響英聲遠而不絕至十一世孫曹永洛
等去堯朝皇建二年蒙前尊孝照皇帝恢弘古典敬
立二王崇奉三恪永洛等於時膺符表貢面陳照皇
親訓聖詔比經窮討皆存實錄蒙敕報允興復靈廟
饋嗣蒸嘗四時虔謁使恭恭嗣子得展衷誠之願爓
焚孝孫長畢昊天之恩遂雕鏤真容鐫金寫狀庶使
□□相度永劫而不泯七步文宗傳芳猷於萬葉者
也其詞□□□□□粵維王磐石斯固締緒攸長
波連溟渤枝帶扶桑分珪作瑞建國開疆蕙樓茵閣
遠邁靈光其器調高奇風革梳朗談人刮舌靈虵曜

掌東閣晨開西園夜賞松華桂茂玉潤金響其聲馳
天下道冠生民才驚曠古德重千鈞混混不濁磨而
不磷如何一旦萎我哲人其三山舟易失日車難駐一
謝人間長遵坦路風哀松栢墳穿狐兔何世何年還
成七步其四迺考惟昆廓定洪基受圖應曆運合紫微
一辭皇闕永背象□聲隨日轉響逐雲飛其五大隋開
皇十三年歲次皇□之吉此碑文不極工考歐集古
錄趙金石錄及近代金薤琳琅石墨鐫華金石志俱
不及載

嚴柱峰副憲

曾

家有金剛子念珠一串凡百四十顆

色如水晶大司農馬齊公出所藏僅十顆較大尤有
光采云顆直百金也又示柴窰椀一碧色形製甚古
流光四射非哥定宣成諸窰比亦尤物按格言要論
云金剛子出安南六楞徧身花紋作數珠冬月不冷
有龍眼大者榛子桐子大者愈小愈精須花紋深細
門人歙縣江闖赴解州守予以呂文簡公涇野所創
解梁書院及公祠堂屬修葺蓋文簡曾由翰林謫判
此州也又同年子孟鏐子美知封丘縣有書來予答
以唐高常侍忠公達夫常尉此縣往者給事中同年
岳鎮九峰知縣事為建專祠請于上官春秋祀之當

時加修葺俾勿廢墜名世先賢俎豆不衰所關人心
風俗廉頑立懦者不小今之才有司或笑爲迂闊不
急之務然古之循良未有不加意于此者不知子美
能用吾言否耳

春秋屬辭十五卷新安趙汭子常撰其義例有八一
曰存策書之大體二曰假筆削以行權三曰變文以
示義四曰辨名實之際五曰謹華戎之辨六曰特筆
以正名七曰因日月以明類八曰辭從主人宋文憲
公濂序之

吳仲圭晴江列岫圖一卷自題至正辛卯秋日梅道

人寫有仲圭小印文休承弇州山人二印鄧文原題
詩云長江亭亭桑落洲青山獨傲蘋花秋邊聲已逐
鼓鼙盡水氣欲挾漁榔浮謫仙騎鯨五柳老真景變
滅隨沙鷗空餘秦箏與羌管斷續不說琵琶愁梅花
菴中解蒼珮宴作得意毫端收空青點雲碧痕濕方
諸取月寒光流江上老翁在何許似覺領首相遲畱
佳峰稜稜鐵鈎鎖千樹點點同浮漚要知翰墨灑清
氣俗子政爾勞雕鏤山空無人息機事青眼不與王
公酬揮毫汗漫凜太古疑跨獨鶴遊磯頭人在江湖
貴適意底用絕俗藏林丘披圖覽卷重太息天際杳

靄疑歸舟又跋云蒲城孫世美編修與予同舟南下
出嘉遜翁所藏梅道人晴江列岫卷相示筆意高古
墨氣淋漓不在董巨之下因作長句題之不能讚其
八法之工也文原識下有巴西鄧氏善之印末有資
善大夫南京吏部尚書魏驥仲房跋書法亦工

海天旭日圖一卷後有趙松雪書海賦前有唐李將
軍海天旭日圖妙筆十一字書法極工有太原王達
翰林學士李天祥天水趙堽圭齋歐陽玄題字又虞
集八分書後云小李將軍筆絕無僅有得趙文敏公
書海賦匹之可稱合璧楊文敏公跋云臣榮備職內

閣躬逢聖治休明禮樂隆盛澣沐之暇皇上御延英
閣特召臣等出內庫書畫縱觀首得趙孟頫幽風圖
御製長篇題之是日近侍翰苑諸臣俱有頒賚臣榮
蒙恩特賜茲卷海天旭日圖實爲非常慶幸永作傳
家之寶宣德七年壬子七月大學士臣楊榮虔沐謹

誌

溪山漁釣一軸趙松雪畫故相國真定梁公家物也
松雪自題詩云桑苧未成鴻漸隱丹青聊作虎頭癡
久知圖畫非兒戲到處雲山是我師溪上先人之敝
廬南山秀色照庭除何時共買扁舟去看釣寒江縮

項魚晉齋識見超卓久與僕客京師情因洽甚今晉翁先得歸鄉將與青山為主賓漁釣以自適僕情爲之慙於其行畫此以寄意且爲後會之故事云

老子青牛圖亦松雪作自題至大四年三月

新都秀運集二卷嘉靖間歙人王寅仲房所輯歙令

門人靳治荆熊封重刻之意倣唐人中興間氣集惜

成家者寥寥又雜出商賈之流無足觀者靳又嘗刻

黃太冲宗義梨洲集金陵鄭谷口籃頃寄其石柱看

梅詩卷十絕句熊封又介予友曹員外升六貞寄其

詩數百篇請予論次風流好事如此非俗吏也今遷

知固原州

說苑宋桓公愛公子目夷太子茲父請於公曰請使

目夷立臣爲之相兄以佐之相兄二字甚奇

內閣傳 諭翰詹衙門自讀講已下各錄詩賦進

呈 御覽

瀉山問仰山作麼生是無異名底道理仰曰瓶盤釵

釧券盂盆此句似栢梁詩體

胡釘鉸叅寶壽沼禪師師問曰還釘得虛空否後叅

趙州舉前話州曰祇這一縫尚不奈何胡于此有省

州曰且釘這一縫釘鉸能詩又載禪林公案

象耳袁覺禪師嘗云東坡云我持此石歸袖中有東
海山谷云惠崇烟雨蘆雁坐我瀟湘洞庭欲喚扁舟
歸去傷人云是丹青此禪髓也予謂不惟坡谷唐人
如王摩詰孟浩然劉春虛常建王昌齡諸人之詩皆
可語禪

白楊順禪師偈落林黃葉水流去出谷白雲風捲回
作文字觀亦是妙句

龍門世奇首座洞臻玄奧佛眼禪師命分座師辭曰
此非細事願生生居學地工而自煅煉此語可愧後之
上堂領衆者多矣卽吾儒如_此爲箴砭亦何慮德不進

業不修乎

宋兩張子野皆名先一與歐陽文忠友爲孝章皇后
戚里之姻官止知亳州鹿邑縣寶元二年年四十八
卒文忠誌其墓云好學自力善筆札一與蘇文忠公
爲友公集中云昔自杭移高密陳令舉張子野皆從
至松江夜半月出置酒垂虹亭上子野年八十五以
歌詞聞天下作定風波令李公擇守吳興東坡過之
會於碧瀾堂子野作六客詞坡詩所謂詩人老去鶯
鶯在公子歸來燕燕忙詞家所謂張三影者是也官
至都官郎中死葬吳興弁山有集一百卷今有張鈞

魚灣見掌故集胡應麟筆叢云兩張先皆字子野俱
第進士其能詩壽考悉同一博州人號張三影者是
也一吳興人胡作正楊而荒陋如此

新安商某者萬曆壬午行賈江西過九江有舟被盜
劫舟中人羣裸號泣問之七人皆孝廉上公車者商
賜之衣食贈之資斧泣謝而去明年七人中登進士
者六其一則莆田方萬策也又數年方分巡嘉湖一
日讌於屠冲陽副使家是時商以折閱不得已自鬻
於屠方於衆僕中遙識之問曰爾新安商某姓曾遊
江西乎對曰然曰猶憶八年前在江州遇舟爲盜劫

者活若干人內有公車舉人七人賜給行李事乎商
已忘前事良久乃對曰有之方亟出席長跪曰吾恩
兄也相訪已數年不可得乃在是乎一座爲之驚歎
方卽告於屠攜往署中畱數月贈之千金又報同難
者各致問遺商遂更爲富人歸新安矣

明嘉靖四十一年太湖中有二龍一黃一白合股而
行一青龍隨之由海鹽硤石東南入海四十二年海
鹽午潮有海馬萬數其一大如樓房沿塘羣行二十
餘里入海聲如雷霆萬曆元年又有海鳥其大如舟
翅如車輪自海南飛至翹首掉尾於波濤之上聲如

風雨海水皆沸

予少喜觀顏從喬僧世說未詳從喬出處觀皖志隱逸傳乃得其概從喬字若齡懷寧人京兆素子也性恬曠喜讀書尤耽釋典愛豹嶺林泉之勝遂卜居終身焉嘗作隱士詩以見志有集名種秫同時有倪爾嘲方應賓二人者同隱冶塘山中與從喬爲世外交倪贈詩云石門湖水隔溪碧豹嶺山月當牕明與君一別忽秋晏短髮朝來白數莖皆明季高士也

阮濬字季子懷寧人築草堂於龍山冬夏惟披一衲因以自號性嗜酒工畫時攜襍被酒罏畫具命一僮

肩之遊散山水間遇勝處輒流連忘返謂其友劉鴻儀曰死卽葬我草堂之側磨片石題曰酒人阮一衲之墓未幾卒劉及同志葬之如約顏所居曰一衲菴每歲晏劉必攜酒澆其墓有詩弔之曰醉君君豈知去去復回顧一片紙錢灰飛上梅花樹濬詩多寒瘦畫格清絕入本朝乃卒亦高士云

崇禎十一年桐城縣郎氏婦人產二物一類西域胡一類象十二年汪氏婦人產一猿先是七年太湖縣雨黑黍民沈萬勳者取種之越歲成樹高二尺葉如枸杞終冬不枯但不花不實耳 國朝順治十五年

望江又雨黑黍

嘉靖中石埭諸生章仁者通幻術與其黨謀不軌官軍圍之仁騰上樹杪就執之惟絳衣在焉仁已遁去後池郡李禎祥爲瓊州通判其僕渡海遇颶風漂至交趾引見其國相卽仁也詢桑梓事甚悉遣人護送歸瓊州

注夢栢貴池人崇禎中丞蜀之長壽縣以禦賊死妻亦死僅遺一幼女來姐僕余生夫婦借居太學生周維魯家夢栢有甥吳雲者其長女之子也欲妻來姐來姐叱之曰我爾姨母也何得作此無禮雲慙且恚

乃私許周爲側室謀旣成其父客徐鏡水者知之急聞來姐先是來姐襁褓中已受青陽老田吳氏之聘婿名國璋乃誓死剪髮付徐持告縣吳與周皆獲罪會長壽舊典史某者饒州人與夢栢爲僚友感其義迎來姐於家育爲己女歸饒而令余生迎國璋於青陽合卺成禮久之乃同歸池州此一事也夢栢之烈女之節典史幕客之義三美具焉皆足書也

邢狗兒當塗布政使邢公珣之僕也珣守贛從王文成平宸濠之亂每履行陣狗兒以身翼之用雙刀直前搏戰所向披靡公卒狗兒溷跡市廛一日公夫人

及諸子欲觀其能夠兒不可強之曰刀神物也不可
褻必欲試之須營一空室固其扃鑰穴而窺之慎勿
以身近也如其言頃之室中火光迸發如電影激射
久之雪雹彌空狂飈驟集杳不見人狗兒疾呼曰速
擲雄雞來比雞入得血乃止蓋古劍俠之流云
方授字子畱桐城人明末諸生工詩有鴻毛軒冕之
意甲申聞李寇之變遂焚筆硯時同里世族多疾足
以赴功名其父強之不可則撻之授逃之四明山中
結茅而棲採橡栗而食間爲詩得數百篇流傳人間
時人以爲真隱

侯珦亦桐城諸生博洽工文嘗衍蘇氏織錦迴文凡
三言四言五六七言斜直方圓周旋出入得詩八百
首又善投壺著壺譜奏矢一百四十法其友請試之
置酒張壺按譜投之縱橫進退飛躍疾徐各臻其妙
連日繼夜譜法纔盡其神解如此

國子監祭酒鄂拜吳苑等題爲恭進 御製碑文

以昭熙朝盛典事康熙二十八年閏三月准翰林院

移會內稱顏曾思孟贊詞已蒙 御製發出相應

將四子贊詞并 孔子贊詞一併交與國子監勒名

摹榻轉送禮部頒發各直省等因到監 臣 衙門隨於

本年四月內有恭請

御書勒石等事一疏奉

旨這贊字着翰林院書寫頒發欽此隨經翰林院

書寫發到工部相地諏吉庀材鳩工建立碑亭礮石

鐫刻今年三月工程告竣

臣等將

御製碑文二

道敬摹榻本裝潢成軸恭呈

睿覽伏惟

皇

上德本生知聖由天縱

王言典重親觀德於橋門

帝學高深振淵源于洙泗羹墻可晤備論贊於先

師華袞爲榮兼頌揚乎四配彩亭聳峙兩楹之俎豆

增輝麗石穹窿數仞之宮墻益峻洵斯文之隆遇爲

千秋之鉅典也伏乞

皇上敕下禮部頒行直隸

各省斯正學昌明天下之觀瞻允愜且譽髦蔚起諸
生之誦法彌殷矣

禮部議得衍聖公孔毓圻疏稱

皇上鑒闕里廟

貌隳敝特發內帑遣官監督修理我

皇上之曠

典隆恩有逾前代而廟貌之輝煌壯麗度越曩時典

既尊崇禮宜隆重特敢題請照例遣祭等語查明朝

實錄弘治十七年

聖廟落成遣閣

臣

李東陽前往

致祭我

皇上稽古右文崇儒重道治統正帝王

之極心傳接洙泗之宗聖域鳩工特重專員之選良

材庀具爰頒內府之金廟貌改觀几筵增麗規制倍

隆于往昔楷模永著于來茲今當落成之時應遣大臣告祭恭候 命下之日其應行典禮再議具奏

碧玉露漿方於中秋前後用無五倍新青布一二疋

扯作十餘段每段四五尺五更時於百草頭上

荷葉稻苗上尤佳

先用細竹一根掠去草上蛛網乃用青布繫長竹上

如旂樣展取草露水絞在桶中展濕卽絞視青布色

淡則另換新布陽光一見則不展所取露水用磁罐

洗淨盛貯澄數日自清晚間用男乳一酒杯

約一兩半

白蜂

蜜一酒盞人參湯一酒杯多少同乳

人參須上等四五分不拘

總入一

宮碗內將露水一飯碗攪入宮碗共得七八分和勻

以綿紙封口用碟蓋好次日五更燒開水二大碗將

宮碗內露隔湯熬熱睡醒時緩緩溫服之藍所以殺

蟲露去諸經之火參補氣乳補血蜜潤肺治一切虛

損勞症有奇効

青州響水澗南有廣福寺寺有元魏武定二年齊郡

太守劉明世造石像記隋文帝建舍利塔碑按趙德

甫金石錄目錄有東魏劉起貴造像記東魏逢元彥

造像記皆在武定二年獨此碑近在青州不知何以

不錄隋碑乃孟弼書安丘張貞杞園云此碑雖佞佛

祝釐之詞文頗雅馴字穠勁饒古意非篆非隸真八

分也集古金石二錄及近世金薤琳琅石墨鐫華諸書俱未收悉遂湮沒故著之

朝中馳道自諸王已下無敢騎行者惟祭祀進呈祝版出天安門則太常卿騎從由馳道中行

寶泉局大使胡隆大嵩衛人其弟楨少習儒業妻于氏以康熙壬申病卒已殮未蓋棺而甦家人驚喜妻起坐張目周視久之曰非我家也何爲至此家人環聽且駭問之則操粵音曰我張氏東粵人也嫁濟南王家昨病臥牀簣間夢至一官府有王者閱文書云張氏未合至此可送還卽有二卒引出四望幽暗唯

中間有路如白晝然數聞暗中有絲竹聲意欲佇聽之卒曰可速行彼輪迴六道不可往唯此路可達人間耳送至此二卒遂不見今此何地吾夫家眷屬皆安在衆語之故泣涕求還衆不可曰若魂魄雖異形體則于氏也豈得歸他人家力勸與楨重合數日始從張氏知書通制舉業每楨作文輒就之評騭楨應童子試歸閱其文輒不許曰君宜改名梅卽舊如其言再試乃許之曰君必得雋矣名且在第二已而果然王人岳騭大司農述之甚悉云

予昔與故友葉文敏方論牛李君子小人之辨語見

前卷適讀崔鷗德符論楊嗣復備言小人常勝君子
常不勝其大端有十二而終之曰君子小人之不敵
亦明矣此鄭覃陳夷行所以罷黜李德裕所以謫死
窮荒李逢吉宗閔楊嗣復輩所以卒於翔祥而得志
豈足怪哉崑山王志堅弱生跋曰李贊皇之相業唐
季無兩弇州以比裴晉公而稍昂之其論當矣至其
爲人論者猶或不滿以爲不能釋憾解仇亦不盡然
也仇士良以武宗之立非宰相意勸帝誅楊嗣復李
珣戶書杜悰見德裕救之三人者皆牛黨也使以私
怨行之立蕭粉耳乃與同列上奏至于伏地不起楊

李得全僧孺二李能之乎二李之惡極矣貶之未可
謂私白敏中令狐絢皆二李黨贊皇引用不疑而卒
受其禍憾自不釋仇自不解耳非贊皇之過也晁无
咎詠贊皇云當年伏地全楊李公亦何知愛惡間云
亦同此意弱生著史商詳載此議觀三公之論則知
蘇黃門牛李論之詩而予前說之非臆矣恨不能起
亾友于地下而質之也

予讀唐庚集嘗薄其爲人其說亦著之前卷王弱生
曰唐子西議論文章皆蘇氏緒論願以黨禁方嚴而
子西又附張商英以進其著作多不及蘇氏止題巢

元修傳及之大致譏貶上蔡司空書論當世文學之士止言尹師魯王深甫其趨時也如此然亦何救於貶謫哉此論亦與予言若合符節所謂三代直道也予嘗薄張浚之人有題其墨蹟一詩并載江盈科進之詩於前卷頃又見王弱生讀宋史張浚傳二絕句云一立彤墀喙便長有時鮑老也當場富平未起苻離又可悔彈文到李綱十萬良家等蟻螻苻離一夕水流紅魏公心法由來異鼻息如雷學寇公此詩尤先得我心之同然者

戶部同官

予以康熙三十一年八月自兵部督捕侍郎調戶部侍郎

戶部尚書王公隲

順治乙未進士同年山東福山人

左侍郎蔣公弘道

順治己亥進士山西臨汾人官至左都御史

夜暗歸雲遶枕牙一首乃宋姜夔堯章詩見白石集列朝詩收之作張如蘭詩收翁博極羣書亦有此誤

楊夢山先生

魏明吏部尚書

五言古詩清真簡遠陶韋嫡派也

五律尤高雅沉澹予嘗選評其集刻之牧齋所取非其至者而又云李中麓諸人咸推之楊李詩格相去霄壤顧反引李以爲楊重耶大抵牧齋錄詩意在庀史詩之去取殊草草不足爲典要讀者當分別觀之勿爲盛名所怵乃善耳

平臺在太液池西隄兔園東北中有團頂小殿本武宗所築閱射之地又後左門左翼室亦曰平臺今上曾召見內閣于內賜詩右馬文簡公汝驥西苑詩云然後左門平臺自康熙初爲內閣直房今內閣仍移午門之內內三院每九卿五鼓奏事皆候於平臺

駕出御乾清門乃入

以今揆之當是中左門耳

錢牧翁作彭幼朔傳云近有人入青城山見老人跨白鹿曰我三國徐庶也此與蜀人費經虞所言同特終南青城地異耳

命內閣大學士阿蘭泰戶部尚書馬齊兵部尚書索

諾和同法司清理刑部獄囚減釋者一百有八人兵部督捕順天府等衙門人犯一併減釋有差

前詹事府少詹事兼翰林院侍講學士以副使原品休致耿介卒介字逸菴河南登封人順治壬辰進士與睢州湯尚書斌上蔡張知縣沐齊名稱中州三大儒云

五月士禛蒙 恩授階通議大夫祖考布政府君

考祭酒府君俱 誥贈通議大夫經筵講官戶部右

侍郎祖妣成氏張氏

明時以方伯公俱贈淑人

妣孫氏

前以士禛官國子祭酒贈恭人

妻張

氏前贈恭人俱

誥贈淑人先祖年及大耋親教諸孫相繼

成進士先考妣教諸子雖稍寬假然以布政公之故
督課殊切迴憶庭訓且四十年矣至是乃稍食其報
感激 國恩不禁泫然吾子孫輩當知之

居易錄卷二十終

居易錄卷二十一

濟南 王士禛 著

謝鎮西妾阿妃有國色甚善吹笛謝公阿妃誓不嫁
比中郎將邳曇以計得之阿妃終身不與曇言此與
息夫人極相似王右丞息媯怨云看花滿眼淚不共
楚王言意尚含蓄吾鄉孫文定公泚亭廷銓詠息夫人
詩云無言空有恨兒女粲成行讀之輒失笑以贈阿
妃不知當作何對也

牧齋力攻空同其稍能與空同異者則亟進之至云
空同就醫京口吳中人士皆絕弗與通又言高郵王

磐口占詠老人燈詩面譏空同尤非事實當時空同
文章氣節震動天下王磐何人敢爾無禮且空同劾
壽寧侯劾劉瑾名榜朝堂號爲黨魁卽不以詩名世
已仰之如泰山北斗乃絕弗與通如避豺虎蝮蛇然
何爲者耶牧翁尊一學張禹孔光之西涯強擬東坡
賤一能爲汲黯之空同曲加文致以此修史其顛倒
是非必矣

初三日

皇長子奉

命告祭

孝陵以

聖

躬初豫也

禮部尚書
顧八代從

前監察御史陸龍其卒龍其字稼書浙江平湖人康

熙庚戌進士龍其以御史罷歸授徒常熟逼歲除乃
必抵家頃之卒年六十三壬申冬十二月二十八日
也

姜南鹽車道聽云國初庶吉士或在中書省或在文
華堂後乃改置翰林梁用之作徐孟昭傳云孟昭登
洪武乙丑進士第行浙江道監察御史入爲禮科庶
吉士日記事侍上左右然則洪武中六科亦有庶吉
士矣

宋程卓使金錄云十八日早頓欒城縣蘇黃門轍墓
尚存縣治之側按潁濱自嶺外歸老許州葬郊縣小

峩省與長公同兆域樂城安得有墓按歐陽公銘老
泉墓云蘇顯唐世實樂城人以宦畱省蕃蕃子孫穎
濱文集號樂城示不忘本也

初九日

命宗室公福善內大臣舅舅佟國維內
大臣明珠吏部尚書庫勒納以

上體初豫告祭

天地

宗廟社稷

予生平喜竹所居輒種之順治庚子辛丑間任揚州
府推官於讞事廳前後皆種竹爰書之暇輒嘯詠其
下廳後故有小亭可置牀几倦卽偃息其中自賦一
詞題壁上偶未編入衍波詞今錄於左云手種牆南

千箇竹春雨瀟瀟拔地參天綠斫取杉皮新縛屋直
須傲煞篔簹谷 解道難醫惟有俗試問旁人無竹
何如肉未必禪心超忍辱且從玉版叅尊宿存之亦
可追想少年高邁之氣不爲卑冗縛束如此

庚午歲聞周石公

麟之

僉都述鄒魯害御史何瞻瞻子

兢報父讎事遂筆之第二卷中適讀杭人姜南明叔
蓉塘詩話乃知瞻亦小人耳姜云弘治初浙江巡按
御史暢亨劾鎮守太監張慶不法事慶亦誣亨以他
事具奏草則出於致仕御史蕭山何瞻舜賓之手也
後何卒爲知縣鄒魯殛死人皆冤之而不知其得罪

名教不足惜也故知人論世不可草草

四川提督總兵官吳英說昔得祕方治撲打跌損傷極效雖重傷瀕死但一絲未絕灌下立甦往在福建爲副將時軍中有二弁相鬪皆重傷其一則死矣吳聞馳往視之惟心頭氣尚微煖亟命以藥灌入覺曾聞喀喀有聲不移時張目索食翌日遂能起行自後屢著神效云其方以十一月采野菊花連枝葉陰乾用時每野菊花一兩加童便無灰好酒各一碗同煎熱服

又一方未退胎毛小雞一隻和骨生搗如泥作餅入

五加皮傳傷處接骨如神

宋古文始於柳開穆修鄭條三人柳穆今有集人多知之條蘇州人天聖八年王拱辰榜第三甲進士咸平三年陳堯咨榜進士爲之子也兄修景祐三年王整榜進士及第見姑蘇科第表

宋鄭虎臣殺賈似道者吳人也其家居第甚盛號鄭半州四時飲饌各有品目自著集珍日用一卷元夕閨燈實錄一卷亦見姑蘇志

李侍郎厚菴

光地

言聞兵部尚書索諾和公說用未熟

青黃色大柿一枚好酒煎至九沸去酒取柿食之治

失血症神效

張寶菴

璽

妹婿知新野縣寄李文達公賢古穰文集

寫本三十卷天順日錄古穰雜錄皆在集中予按篁墩集云古穰集三十卷走所編者梓行已久公子尚寶卿士欽弟錦衣千戶士敬菟其家藏與得之四方者復畀走詮次爲續集定爲二十卷如右此蓋前集也篁墩撰公行狀又云有和陶詩二卷和杜詩一卷讀易記讀詩記各一卷南陽李氏族譜若干卷體驗錄一卷今本皆無之大抵公之得君與李文饒相似才略相業亦略相當然公遇石亨曹吉祥而不死以

功名終文饒晚遭貶竄竟死太牢之黨則命也

鍾退谷惺論高岑云唐人如沈宋王孟李杜錢劉雖兩人並稱皆有不能強同處惟高岑心手如出一人此語謬矣所舉數家惟李杜門庭判然其他皆不甚相遠推而至於元白張王溫李皮陸之流莫不皆然獨高岑迥不相似五言古則高古樸岑靈秀七言古則高雄渾多正調岑奇峭多變調強而同之不已疎乎

近日金陵有刻唐詩十集者謂爲予所訂或作序假爲予言云予奉此爲金科玉律年來於此道稍有會

者得力於是書良多云不勝駭異及訪是集閱之乃
標華亭唐汝詢仲言名大旨在通高漫士李滄溟鍾
退谷三選之郵而以汝詢詩解附之強分甲乙丙丁
等目淺陋割裂可一笑也門人盛侍御珍示方爲予
較刻唐詩十種選集集名適同慮其亂真且悞後學
當寄書使正之

唐五言詩開元天寶間大匠同時並出王右丞而下
如孟浩然王昌齡岑參常建劉昫虛李頎綦母潛祖
詠盧象陶翰之數公者皆與摩詰相頡頏獨儲光羲
詩多龍虎鉛汞之氣田園樵牧諸篇又迂闊不切事

情而古今稱儲王何也高適質樸不免笨伯杜甫沉
鬱多出變調李白韋應物超然復古然李詩有古調
有唐調要須分別觀之

盛唐諸公五言之妙多本阮籍郭璞陶潛謝靈運謝
眺江淹何遜邊塞之作則出鮑照吳筠也唐人於六
朝率攬其菁華汰其蕪蔓可爲學古者之法

七言古詩諸公一調唯杜甫橫絕古今同時大匠無
敢抗行李白岑參二家別出機杼語羞雷同亦稱奇
特

杜常北宋人其過華清宮詩云行盡江南數十程曉

風殘月入華清朝元閣上西風急都入長楊作雨聲
今唐詩多誤收之又荆叔漢闕山河在一首不知何
代人僅見石刻今亦收入唐詩

六月大雷震電右安門萬壽宮側雷擊一人震死者
三人皆屠戶耳

吾鄉沂州有土瑪瑙紅多細潤者佳胡桃紋者最貴
亦有大雲頭花及纏絲者次之紅白麤花者又次之
大者至五六尺性堅用砂鋸開板嵌桌面胡牀屏風
之類又名錦犀瑪瑙右見格古要論雲林石譜云峽
州宜都縣有瑪瑙石紋理旋繞如絲間有人物鳥獸

雲氣之形泗州盱眙縣寶積山與招信縣皆產瑪瑙
石宣和間招信令獲一石大如升其質甚白中有黃
龍屈盤之狀貢入內府又云黃龍府山中產栢子瑪
瑙石色瑩白上生栢枝或青或黃白蒙亨使北北主
遺一石大如桃上有鸚鵡如豆許棲栢枝上頗奇密
州安丘縣瑪瑙石產土中水際色瑩白紋如刷絲盤
繞石面成諸佛像汝州瑪瑙石色多青白粉紅瑩徹
有紋理如刷絲右皆石之似瑪瑙者然漿水瑪瑙淡
紅者內有花紋如栢枝亦謂之栢枝瑪瑙瑪瑙出北
方及南蕃西蕃非石非玉堅而且脆有人物鳥獸形

者最貴有錦紅合子截子纏絲等名次淡水紅者曰
漿水紫紅者曰醬斑有海蜚色者兔面花者皆見要
論

王文恪鑿姑蘇志方技載席謙善棊下引杜詩云席
謙不見近彈棊是亦譌彈棊爲奕也何怪今人沿襲
之謬

莊子漁父篇所謂四患者好經大事變更易常謂之
叨專知善事侵人自用謂之貪見過不更聞諫愈甚
謂之狠人同於已則可不同於已雖善不善謂之矜
右數語王安石贊也予以爲更勝老泉辨姦論

睢州田蘭芳梁紫寄予所著文集梁紫與商丘劉榛
山蔚同里同起侯方域朝宗之後爲古文有聲梁宋
間今劉死田老於諸生皆宋牧仲中丞友也

宋牧仲撫江西一夜夢予屬賦瀟湘雁立成五言覺
而憶之不遺一字詩云岸闊水無際月明春雁翔徘
徊念儔侶清影落瀟湘時康熙壬申四月十九日也
李焯字振雅長垣人萬曆甲辰進士好道術蓄一不
灰木火爐爐中香煙自起則呂仙降其室與寤言中
夜惟一小僮聞之餘人不聞也官青州知府府署後
有園前守遊者輒病恒榻鏞之焯入園周視曰無他

異唯荷池中瘞萬金此爲祟耳其二子請發之焯曰
金鑄柴寅賓名字吾何可妄取乃復扃其門加封識
焉柴寅賓者亦長垣人時方成進士知某縣也一日
坐公堂忽對城南雲門山咄咄久之呼兩隸前曰南
山某處有兩狼厄一擔夫亟往救緩無及矣隸馳往
至南門外過一伎館索茶焯坐堂上忽發怒曰吾戒
諭嚴切乃淹留伎館耶卽遣急足偵之果在爲述守
言乃大驚急同至南山下則一擔夫與兩狼相持力
盡幾斃矣遂協力殪一狼擔夫得脫其神異往往類
此在郡無疾一日忽召二子曰呂仙召我我將逝矣

遂卒年甫五十二後十餘年柴寅賓果守青州發池
獲藏金萬富甲邑中柴歿其子不能守竟敗落李族
孫丙辰進士聘說

六月二十五日滿漢大學士滿尚書都御史漢禮部
尚書張英 賜遊暢春苑泛舟 賜肴饌旣而

賜大學士王熙以 御書長春宮頌及滿尚
書人 御書扇一先數日張蒙 賜扇 御

書唐詩忽見寒梅樹花開漢水濱不知春色早疑是
弄珠人其背面畫梅一枝左都御史沙海得登登山
路行將盡一首

諸公言在暢春苑見外國所貢玻璃瓶二一貯水去其蓋覆卽有烟自水中出夜有火燄一水中貯小木一段鈎出別以木拭之可以取火士禎按拾遺記西海有浮王山山下有穴穴中有水其色如火波濤灌蕩其光不滅晝則通朧不明夜則照曜穴外是謂陰火木華海賦所云陰火潛然是也太平寰宇記曰不灰木俗多爲鋌子燒之成炭而不灰出膠州其葉如蒲齊地記曰盧水側有勝火木方俗音曰檉子卽東方朔神異經不灰或作燼之木也又徐無山有不灰之木色黑似炭而無葉有赤石磨之則火發以然不灰之

木可以終日郎瑛自言得不灰之木須石腦油塗之始然右見升菴新語及方氏通雅又關尹子曰兩木摩火生

麥粉不拘多少用陳醋熬膏貼無名腫毒神效

前寧都令李聘說

李中麓太常云如楊慈湖之易林之奇之書詩則王氏總聞春秋則木訥經筵及魏湜之禮記集說多有高出宋註之上者此外能發明經旨者抑又不止四五十家宋刻已古鈔冊漸訛再過百年俱失傳矣必須題請之後有京板以及各書坊有鏤板始可遍行天下不然則以拘拘背朱爲嫌而經術不幸不滅秦

火矣又有與霍渭厓書云解詩者無論漢唐宋儒如
王氏總聞歐陽本義李黃集解錢氏詩說嚴粲詩輯
呂東萊讀詩記有高出朱上者有互相發明者古人
於詩之山水制度魚蟲草木詳爲之釋而意則欲得
之言外故夫虛心活法斷章取義者讀詩之大約也
譬諸聞人之言而又轉述於人已不能無訛乃又強
定一主意是豈逆志之道哉詩之柄者詩之病也不
小序而詩柄焉此世儒之拘見也中麓遂於經學其
言如此

萊陽姜如農塚如須垓兄弟齊名時稱二姜如農崇

禎末爲給事中建言謫戍宣城衛鼎革後兄弟遂卜
居吳郡不歸鄉里給事死遺命葬宣城以謂故君未
賜環不敢首丘吾友張杞園貞作祠記書其事南北

名士多歌詠之旣而遷其夫人之匱合葬於宣而葬
給事之衣冠於父母墓左予謂非禮也夫給事身值
滄桑居吳不返或歲一歸省墓或數年一歸省墓猶
可也死不首丘又不歸骨先壟顧遠葬戍所此則矯
激好名之過而害天性之恩可已而不已者也至遷
其夫人遠祔江南而以衣冠代歸葬此尤非也已不
歸葬已無以慰父母之望於地下乃并其婦已葬之

骸骨大去其鄉明其與父母絕矣孝子忍乎哉是何其於君臣之義厚而於父子之恩薄也禮曰鳥獸失喪其羣匹越月踰時則必反巡過其故鄉回翔焉鳴號焉躡躅焉踟躕焉然後乃能去之而況人乎況父母之墳墓乎予讀思穎詩每致憾於歐陽永叔茲給事之葬亦未敢傅會以爲然聊書杞園記後以質諸知禮者云

牛僧孺以詩謁劉夢得夢得爲飛筆點竄僧孺深憾之至作相後纔吐劉愧悔以戒子孫故王建云人怪考詩嚴予生平手定朋友之詩多矣率從直諒諒之

者固多抑豈必無怪其嚴者昔爲郎中時嘗爲戶侍

魏敏果公

象樞

閱其集魏以手札報謝云于論文談藝

之中見吾心不欺之學魏講學故

云

然不欺二字實

談藝根柢耳

杜詩公孫大娘弟子舞劍器行序云開元五載余尚童穉記於郾城觀公孫氏舞劍器渾脫瀏離頓挫獨出冠時按陳暘樂書云樂府諸曲自古不用犯聲唐自則天末年劍器入渾脫爲犯聲之始劍器宮調渾脫商調以臣犯君故爲犯聲又唐多解曲如柘枝用渾脫解之類觀此則劍器渾脫自各爲舞曲之名今

人誤讀杜詩序以劍器爲句而以渾脫瀏漓頓挫六字爲句以爲皆極贊舞劍器之妙譌謬沿襲文字中往往以渾脫瀏漓四字連綴用之可笑也

唐王義方彈李義府曰昔事馬周分桃見寵後交劉洎割袖承恩義府固姦邪乃出身如此又小人輩所羞道

梅聖俞宣州雜詩有云一過響山畔常思路中丞中丞之中亦作竹仲切僅見於此

王弇州朝野異聞錄載何心隱事甚詳其略云心隱才高於顏山農而狠幻勝之有呂光午者力敵萬夫

相與爲死友嘗遊吳興幾誘其豪爲不軌又與一富室子善偕之數百里外忽曰天下唯子能殺我我且先殺汝繼之湖中而挾使手書取其家數百金而後縱之善御史耿定向遊京師與處而故相張江陵來訪旣去忽謂定向曰此人當殺我呂光午又數遊蠻中以兵法教其酋長事稍稍聞江陵屬江西湖廣撫按密捕之得之於嶺北見撫臣王先曾祖諱之垣不肯跪曰若安能殺我殺我者張居正也擇健卒痛笞之百餘乾笑而已遂死獄中心隱之本末如此予小時於家故籍中見先曾王父大司徒公撫楚時所刊大姦何心

隱卽梁夫山

變名不一此其一耳

招案惜不存矣而萬曆疏鈔乃載

南給事中趙崇善劾曾王父一疏中以殺心隱爲罪而曲護心隱謂公欲媚江陵而枉殺之其言比於狂吠愚嘗痛心疾首於此因讀弁州所記心隱惡蹟與當日爰書脗合遂手錄之史館諸公自有公議非崇善一人之私言可亂千古之白黑者也

延綏鎮新誌花木類有後姚婆一莖作蓓蕾開花五六瓣翠色俗云舜母亦曰虞美人因虞字而傳會殊謬按虞美人卽鶯粟花俗名米囊有千瓣五色又名滿園春通雅曰虞美人有吳蜀二種碧雞雜志言桑

景舒作虞美人曲而此花輒動先王父方伯公羣芳譜云虞美人草獨莖三葉葉如決明一葉在莖之端兩葉在莖之半相對人或歌虞美人曲則葉動如舞又名舞草出雅州宋曾慥詩芳心寂寞寄寒枝舊曲聞來似斂眉哀怨裴回愁不語恰如初聽楚歌時今詩餘調有虞美人古今通詠虞姬事舜母之名妄矣

通雅蓓蕾謂之勃又爲蓓北人謂之孤蓓音如孤都卽宋景文所云孤庇今山東方言尚云孤都也

惠顯字晦我清澗人東林黨人世揚同產弟也少爲諸生去而從軍積功至延綏副將李自成寇榆林顯激厲將士勉以忠義城陷賊說降且曰若世揚弟能

從我當爲權將軍顯極口罵賊賊怒磔之顯初名顯揚恥兄世揚降賊故更名云世揚子漸字碩亭爲撫邊守備亦罵賊死獨世揚降賊受僞官

來順威武堡應襲傅鏜僕也主母病亟順泣曰主母如此我受撫育猶子也報恩在斯時矣自割臂肉煎進之病尋愈 覺明靈壁人從其主謝成夫婦成綏德州幼子鏞在襁褓道棄之覺明適前行旣問知其故痛哭返求之得於草間乃籠負而行後成無他出賴鏞不絕右二義僕事見譚吉璉延綏鎮志皆明時人

一產三男本朝五十年來直省每歲屢告殊不以爲異戶禮二部會題止行有司給米布而已然南唐時真州民一產三男皆封將軍之號則侈爲非常祥瑞矣古今事不同有如此

涓來少宗伯說劉修撰克猶子壯中明崇禎庚午舉人

困於公車至順治己丑赴會試初入京居黃岡會館是夜夢一神人自空而下類人間所繪畫魁星者連呼狀元劉驚起遜謝顧曰數定矣何遜謝爲是科遂捷南宮殿試果及第第一旣入翰林又一夕夢人告曰君雖狀元及第然官不過五品年不過五十時遇

覃恩加一級爲從五品急請告歸歸未久病卒年四十有三卒時命家人洞開牕戶仰視曰天樂迎我我逝矣又曰我東華真君第三弟子也今召復故位耳劉生平力行功過格制行不減古人

七月十三日漢人九卿卿寺赴暢春苑起居有

旨入見於澹寧居

澹寧居在苑東偏南向借三楹製極樸素

棲霞竺菴禪師名大成覺浪盛公弟子也有和寒山詩云我著弊垢衣衆人生譏謂我著珍御衣衆人稱切要我著毛羽衣衆人皆大笑若我不著衣何人知我妙又白鶴欲升天黃鶴不相許飛入鸚鵡洲求食

洞庭渚千年復千年雙雙變毛羽兩兩竟成仙誰向凡人語

康熙壬子十月攝山僧旭初者誘少婦入山藏於中

峯之麓將狎之忽見一金甲神人身高數丈推大石

懸空而下旭驚走其婦已齏粉矣旭病年餘始愈

僧天花者山東人不持戒律酗酒亾賴人皆惡之遊

方至河西務居焉而飲酒食肉如故久之人頗厭苦

天花一日大市牛酒召鄰里畢集酒酣諭衆曰吾行

脚至此久溷諸檀越今將行矣聊此言別轟飲至夜

半起曰吾明早乃行居士輩畱此勿歸須送我乃返

耳衆疑其所爲去畱各半比天曉索湯沐浴拜佛竟
呼衆曰居士珍重吾行矣入室敷坐而化

予昔讀三原王端毅公逸事愛其詩著之池北偶談
單縣族姪溥適貽秦襄毅公

紘

年譜公事功氣節卓

然爲成弘間名臣詳在國史昔亦載於偶談獨其詩
人無知者略識於此以南道御史謫沅陵北容驛驛
丞寄南臺諸僚友云幾磴煙村傍水涯驛亭喜得遠
繁華閑穿洞口尋鍾乳悶向江頭看蓼花葛粉熟時
堪代飯釣船到處卽爲家深源

木作洪
喬誤

賢矣非知命咄

咄書空祇自嗟以戶部侍郎忤萬安謫廣西叅政述

懷云休嗟飄泊在天邊且趁時光度眼前地勝那同
凡世界官閑真是散神仙春嫌花鳥牽吟興曉厭松
風聒醉眠疎懶竟能成底事幾回猶夢聽朝鞭以南
京戶部尚書致政居谷亭述懷云許國何嘗敢愛身
鐵衣重整幾番新羞貪棧豆甘求退怕累兒孫願受
貧賜玦三爲嚴譴客沉湘兩度再生人祇今畱得形
骸在薄暮纔臨蔗境春

秦襄毅公生時母朱夫人夢天大雷雨有二物蜿蜒
攀牕內窺頭角如麟目光如電驚寤而公生年十七
讀書學宮夜夢神人衣冠甚偉飲以盃水水面光浮

星月自是文思日進景泰元年公車過德州夢一龍
自深淵奮躍而起公攀龍角騎項而飛明年登進士
第

秦襄毅公自言平生居官事神務極誠潔行事惟任
理不任情治民惟用絜矩二字御史惟用易大畜積
豕之牙一爻刑罰一以欽恤爲主

注疏褚氏曰豬除也除其牙也爾雅云豬大防則豬是隄

防之義豬其牙謂防止其牙

秦襄毅公以右都御史總督兩廣軍務公弟南太僕
卿崇寄書云聞兩廣事繁自都指揮以下得專生殺
權重如此在兄處之必有其道公答書曰事繁當以

無事處之權重當以無權處之如是而已

大學士兼吏部尚書李天馥赴暢春苑謝 恩回

籍守制 溫旨慰勞天馥因爲母 誥封一品太

夫人瞿恭請 御筆亦蒙 俞旨頒賜天馥因

奏前恭遇 萬壽節所進書畫等未蒙俯納不敢

帶回仍祈 俞旨收入內府有 旨止畱劉松

年溪亭圖一軸黃庭堅書江安詩一卷范寬江雪漁

歸圖一卷趙孟頫書福仙院記一冊文徵明泥金楷

書一冊董其昌書酒德頌一卷澄泥井田硯一方皆

異數也

廣陵所刻唐詩七言律神韻集是予三十年前在揚州啓涑兄弟初入家塾暇日偶摘取唐律絕句五七言投之者頗約而精如臯冒丹書青若見而好之手鈔七律一卷攜歸其後二十年泰州繆肇甲黃泰來刻之非完書也集中有陳太史其年及二子增入數十篇亦非本來面目矣

僧寶傳石門聰禪師謂達觀曇穎禪師曰此事如人學書點畫可效者工否者拙何以故未忘法耳如有法執故自爲斷續當筆忘手手忘心乃可此道人語亦吾輩作詩文真訣

佛印元禪師謂衆曰昔雲門說法如雲雨絕不喜人記錄其語見卽罵曰汝口不用反記吾語異時裨販我去學者漁獵語言文字正如吹網欲滿非愚卽狂吾輩作詩文最忌裨販所謂汝口不用反記吾語者也

上命內閣學士戴通賚

御書賜大學士李天馥

母瞿曰貞松堂上方有壘曰康熙御筆之寶又賜

天馥 御書一卷曰儒者當學探本原行迪醇茂

循序進德守已冲虛一言一動罔有不謹嘉謨嘉猷

必以入告斯廣譽翁聞而爲周行之士也凡四十七

字末書癸酉倣松雪道人筆意卷首璽亦用康熙御
筆之寶

五祖演禪師綿州人造白雲端端謂曰川藟苴汝來
耶又明覺顯禪師與棲賢謚禪師藟苴不合按字書
云藟力瓦切藟藟泥不熟貌郭一經曰出安子文贊
苴又側下切音鮮土苴查滓也糞草糟粕之類蓋謂
其但講教典未經鑪鞴所得尚糟粕也今山東謂物
之不磨礪滑潤者及人性情乖角不平易者皆有此
稱其來古矣

今語謂皮衣之長者曰褙襖此語最古郭一經曰半
臂衫也起於隋時內官服之

執金吾金吾鳥名古今注云金吾棒也以銅爲之黃
金塗兩末謂爲金吾二說不同

段干姓也老子子宗爲魏將封於段干段干蓋以地
爲氏

居易錄卷二十一終

